

目

440

867.6

部- = 6

忘日精廬藏書志

卷二十五至卷二十九

後

子部雜家類  
釋家類  
集部楚詞類

類書類  
道家類  
別集類

小說類



愛日精廬藏書志卷三十五

子部

雜家類

續談助五卷

茶夢主人手鈔本

錢遵王藏書

宋元伯宇名編

凡十洲記洞冥記琵琶錄北道刊誤志

乘軺錄文武兩朝獻替記牛羊日厯聖宋掇遺沂公筆錄

竹譜筍譜硯錄三水小牘漢武故事漢武內傳殷芸小說

大業雜記營造法式綠珠傳膳夫經手錄合二十種每種

後俱有跋是書無撰人名氏惟於乘軺錄牛羊日厯漢武

內傳營造法式跋中知為伯宇所編耳又惟於十洲記跋

中知伯宇為崇寧時人曾權陳畱縣尉耳若伯宇之為名

為字及其姓氏爵里則均無可考矣所採如北道刊誤志



大業雜記琵琶錄乘軺錄等書今皆失傳其存於今者如十洲記洞冥記漢武內傳漢武故事之類亦多與今本不同俱足以資考訂文淵閣書目著錄列之古今志中殆以開卷係十洲記故誤以爲地志歟

續案西溪叢語引晁伯宇談助云云宋史藝文志晁氏談助一卷郡齋讀書志載封上集二十卷云世父封上府君諱某字伯宇官封上丞

右鈔世所傳漢太中大夫東方朔所撰海內十洲記朔之自序其畧曰漢武帝旣聞王母言八方巨海之中有十洲始知朔非世俗庸人是以延之曲室而親問十洲所在朔云臣學仙者耳非得道之人有國家之盛美將招儒墨於名教之內抑絕俗之道於虛詭之迹臣故韜隱逸而赴王

庭藏養生而侍朱闕矣曾隨師王履行北至朱陵扶桑蜃海冥夜之上純陽之陵始青之下月宮之淵內游七巨中旋十洲踐赤縣而遨五岳行波澤而息名山臣自少及今周流六天所陟天光極於是耳未若凌虛之予飛真之官上下九天洞視百方北極鉤陳而并華蓋南翔大丹而西掖大夏東之通陽之務西薄寒穴之野日月所不逮星漢所不與其上無復物其下無復底臣所識安及於是媿不足以疇廣妨矣按朔雖多怪誕詆欺然不至於著書妄言若此之甚疑後人借朔以求信耳然李善注文選郭景純遊仙詩已云東方朔十洲記曰臣故韜隱逸而赴王庭藏

養生而侍朱門矣則此書亦近古所傳也

景純游仙詩曰朱門何足榮未

若託蓬萊善之注如此其後又曰圓正有奇草鍾山出靈液善之注曰東方朔十洲記言北海外有鍾山自生千歲

芝及神草靈液謂玉膏之屬也若景純所言果以此則此書誠出于晉魏之前矣至其載月支使者謂武帝曰臣今日仰鑒天姿亦乃非有道之君也眼多貪則貪忍口多言則犯難身多動則淫賊心多飾則奢侈未有此四多而成天下之治也其言亦誠可錄故廣鈔之崇寧五年歲在丙戌七月二日記時年四十一權陳畱縣尉捕劇賊于故牆法雲寺

右鈔郭子橫所撰漢武帝別國洞冥記子橫之論以爲漢武明特雋異之主東方朔因滑稽評誕以匡諫洞心於道教使冥跡之奧昭然顯著故謨記名之洞冥而張柬之言隨其父在江南拜父友孫義強李知續二公言似非子橫所錄其父乃言後梁尙書蔡天寶與岳陽王啟稱湘東昔造洞冥記一卷卽洞冥記梁元帝時所作其後上官儀應

詔詩中用影娥池學士時無知者祭酒彭陽公令狐德棻名柬之等十餘人問此出何書柬之對在江南見洞冥記云漢武穿影娥池於望鶴臺西於是天下學徒無不繕寫而尋劉歆阮籍七錄了無題目貞觀中撰文思博要藝文類聚紫臺丹笥之祕罔不咸集亦無採掇則此書僞起江左行於永禎明矣昔葛洪造漢武內傳西京雜記虞義造王子年拾遺錄王儉造漢武故事並操觚鑿空恣情迂誕而學者耽閱以廣聞見亦各其志庸何傷乎按柬之所稱湘東所造洞冥記一卷而此分爲四然則此書亦未知定何人所撰也又此書記曼倩父張氏而王充論衡道虛篇復言朔姓金氏神仙道家之言其荒誕舛錯類皆如此故并鈔之以廣聞見且使後生知雜家小說爲不足多尙此

余之志也

右廣鈔唐國子司業段安節琵琶錄安節文昌孫成式子  
■中爲司業善樂律能■度曲故今錄特詳舊史言成  
式好弋獵所述西陽雜俎紀鷹鷂事最多而安節以善樂  
律錄琵琶又詳術固不可不慎也七月二十三日陳留崇  
寧寺法堂

右鈔熙寧四年集賢王

權字君玉

校

■所纂集北道刊誤志時

大河自澶州東南流今河徙迓遼客者自滑由磁相邱趙  
至于瀛莫矣蓋此書本以備迎送北客問答之間聞君玉  
之子仲勇今續成其書矣未之見也

按錄是歲振受詔充契丹國主生辰使故其錄如此契丹  
今改其國號大遼見宋使無常處不皆在中京也自虎北  
口以南皆漢唐故地因續鈔之以備他日遼人歸我幽薊  
輿地之考崇寧五年歲次丙戌八月三日壬戌陳留縣故  
牆法雲寺伯宇記

右鈔李德裕文武兩朝獻替記其已爲史官所取與挾黨  
情者皆畧之

右鈔大和九年秋季牛羊

一作楊

日歷其後有檀欒子皇甫

松續記云太牢作周秦行紀呼德宗爲沈婆兒謂睿眞皇  
后爲沈婆此乃無君甚矣承和公私之事必啟太牢而後  
行世傳太牢父事承和諸犢又父事叔康乃好事之說過  
其實也八日陳留崇寧監伯宇記

右鈔聖宋撥遺其首云天聖紀元甲子秋八月哉生明海  
陵序而不書姓名當問於知之者

右沂公筆錄一卷三十一事特鈔其九沂公姓王氏名曾  
青社人世所謂青州王相公也

右鈔武昌鮑凱之所撰竹譜而率爲韻語舊於竹譜下注  
云并序而無之又其文脫錯殆不可讀故鈔之特畧八月  
己卯記

右鈔沙門贊盍所作筍譜其僞謬亦多故鈔之亦畧庚辰  
陳畱淨土院記

右鈔本朝北海郡侯唐詢所編硯錄詢字彥猷善書扎其  
第硯以紅絲爲首蓋詢嘗自遣青州益都縣石工蘇懷玉  
者采石于黑山之顛懷玉以爲洞穴深險相傳云紅絲石  
去洞口有刻字乃唐中和年采石者所記竟不知取  
之何用迄今二百餘年人不復有至者懷玉獨與詢所遣

白眞往六七日得石廣四五寸者二鏡以爲硯自嘉祐六  
年辛丑夏四月至癸卯春三月歷二年凡工人數十往得  
硯大小餘五十工人告以洞門巨石摧掩不可復入石遂  
絕其後得之者皆洞外黃赤之石一耳五寸硯流落人間  
者絕少詢自以紅絲石發之自我又人不能徧見品第之  
故以其私意置之第一余嘗於世父秘閣院見所謂紅絲  
者其理太細磨之拒墨但可研雌黃朱粉色亦不甚紅豈  
所謂洞外黃赤之石者耶不然詢以世所罕見者爲錄以  
欺後人哉

右鈔安定皇甫枚所編三水小牘枚自言天祐庚午歲寓  
食汾晉爲此書三水安定郡地名枚安定人故云其末云  
三水人遵美蓋其字也枚又言外王父中書令晉國公宣

宗朝再啟黃閣蓋謂白敏中其書卑脚犬花鵲吠刺客李龜壽事無甚異且慮出白氏之私故不鈔

右鈔世所傳班固所撰漢武故事其事與漢書時相出入而文不逮疑非固所撰也武帝以雄才大畧不肯安於守文汲黯之言是矣雖其將死之言然自謂所爲狂放又言仙人盡妖耳節食服藥差可少病而史亦載輪臺哀痛之詔蓋亦偉丈夫所爲也與其終身不悟若唐憲宗以金丹被弑者有間矣辛巳淨土北窗燭下記

右鈔世所傳漢孝武皇內傳其言淺陋又什有五六皆增贅漢武故事與十洲記其上卷之末有云右從淮南王至稷卨君凡八事附之案神仙傳淮南仙事的指又不出八公定何姓氏據劉根真人傳潁川掾吏王珍問劉君曰聞

神丹不可倉卒求不審草木藥何者爲良君曰昔淮南八方一云公各服一物以得數百歲而命神丹而昇天太清韓衆服菖蒲趙他子服桂衍門子服五味子羨門子服地黃林子明服石韋杜子微服天門冬任子季服伏苓陽子仲服遠志此諸君並已登真降授淮南王道成能變化自在持此故事仙昇定矣今因此傳末并八公所氏以明之焉予以唐天寶五載景戌歲十月十五日終南山居元都仙壇大洞道士王遊巖緒附之矣其言鄙俗其文脫錯至此然則此書遊嵩之徒所撰也癸未伯宇記

右鈔殷芸小說其書載自秦漢迄東晉江左人物雖與諸史時有異同然皆細事史官所宜畧又多取劉義慶世說語林志怪等已詳事故鈔之特畧然其目小說則宜爾也

至於目若巖電事或云裴令公姿容爽儁疾困武帝使王夷甫往看之裴先向壁臥聞王來強迴視之夷甫出語人曰雙眸爛爛如巖下電精神挺動故有小惡耳出世說或云

裴令公目王安豐眼爛爛如嵩下電出語俱收並錄並無

攷訂則其書亦可下闕

右鈔崇寧二年正月通直郎試將作少監李誠所編營造

法式其宮殿佛道龕帳非常所用者皆不敢取五年十一月二十三日潤州通判廳西樓北齋伯宇記時蔡晉如通判潤州事

右鈔直史館樂史所撰綠珠傳史猶精地理學故此傳推

考山水為詳又皆出於地志雜書者也二十六日西樓北

齋鈔

右鈔唐巢縣令楊暉所撰膳夫經手錄大中十年六月成

書迨今二百餘年矣其間如茶目食飲之類茗粥之類皆與

今不同以此知古今之事異宜者多矣必曰井田肉刑邊

豆而飲食者非通之論也臘月八日西樓記

續談助五卷宋刻本為故友秀水令江陰徐君子寅家藏

子寅沒後其家人售于秦汝立氏汝立迺余門人汝操之

弟青年癖古儲蓄甚富亦友于余假而手錄閱三踰月始

訖事惜乎斷簡缺文未敢謬補藏之茶夢閣以俟善本云

嘉靖壬戌之秋八月二日皇山人姚咨識時年六十有八

紺珠集十三卷明天順刊本

**不著撰人名氏**

紺珠之集不知起自何代試嘗仰觀乎天文俯察乎地理凡可以備致用者雜出於諸子百家之說枝分派別原始

要終粲然靡所不載誠有益於後學然珠之爲物生於淵而崖不祐固寶之矣是珠也其色紺然異乎夜光之類特取其文焜耀而已凡人之思慮有爲物所蔽而昏昧者取其珠而玩之則了然心悟泱然冰釋向足以開聰明備記遺忘豈小補哉學者於此能勤而熟攢之亦若提珠在手歷歷無忘其所能雖相去千百歲之久可以坐見其創述之末則囊括倫類蓋無餘蘊矣以是而名其帙不亦宜乎建陽詹公寺丞出鎮臨汀僕幸登其門一日出示茲集俾之校勘訛舛將命工鏤板以廣其傳僕因得以詳究焉增益其所未能所得多矣楊子不云乎侍君子晦斯光塞斯通其是之謂歟紹興丁巳中元日左承直郎全州灌陽縣令王宗哲謹序

質榮重刊序

天順庚辰

重校類說五十卷

舊抄本 秦西巖藏書

宋詹樞撰

卷首有西巖山人印記

小道可觀聖人之訓也余僑寓銀峯居多暇日因集百家之說採摭事實編纂成書分五十卷名曰類說可以資治體助名教供談笑廣見聞如嗜常珍不廢異饌下筭之處水陸具陳矣覽者其詳擇焉紹興六年四月望日溫陵曾慥引

前言往行君子貴於多識稗官小說良史列之九流曾公所編類說蓋此意也余舊藏麻沙書市紹興庚申年所刊本字小而刻畫不精且多舛誤意必有續刊大字善本分符來此編令搜訪咸無焉併板亦不存矣因取所藏舊本

稍加是正鈔板于郡齋庶可壽此書傳士或有志於聖門  
友多聞之訓當謂不為無補寶慶丙戌八月初吉古杭葉  
峇書于建安堂

類說殘本

宋刊本

汲古閣藏書

**同上**

不分卷存仇池筆記隱齋閒覽東軒筆錄三種每  
頁二十行行十六字殆卽葉峇所稱紹興小字本歟案自  
序編纂成書下直接名曰類說無分五十卷四字則慥之  
原本本不分卷此汲古閣秘本書目所以有真本之稱也  
卷首有毛晉印記

自序

皇朝類苑六十三卷

舊抄本

宋江少虞撰

古之史者載籍極博其所表見皆不虛書其軼乃時時見  
於他說不可不知也太史公網羅天下放失舊聞至於分  
散數家之事則甚多疎畧後世猶或非之然則自漢以來  
千有餘歲君臣善惡治亂之外紛紛籍籍日有日繁使論  
著之人隨世哀撥有所未盡况軼入他說者歷年浸久疏  
殘之餘不少概見則史失其傳矣史冊所無有學者不道  
也錯亂磨滅不可復知者可勝計耶我宋肇興聖神克繼  
二百年太平憲物容典踵古治而增華未有輯熙炳煥可  
考如今者也不刊信史誠足以表覈萬代然而秘省邃嚴  
非外學所得見若其遺文逸說事美一時語流千載者摺  
紳先生尙能言之往往皆前日今世巨公名卿老師宿儒  
以其所接於耳目可以警憲于世者筆之載錄傳紀無慮

數十家嘗借其畔散不屬難以稽考曩因餘暇備極討論  
自一語一言皆比附倫類而整齊之去其文不雅馴或有  
牴牾者自餘據實條次不敢以一字增損總凡會目今爲  
一書名曰皇宋事實類苑聖謨神訓朝事典物與夫勲名  
賢達前言往行藝術仙釋神怪之事夷狄風俗之殊纖悉  
備有釐爲二十八門選義按部考詞就班如出一家語不  
待旁搜遠覽而太平遺逸之美麗具在足以觀見當時風  
議庶幾乎尙有典刑哉此學士大夫之所欲聞亦喜傳而  
樂道也深媿識見淺陋擇焉不精取焉不詳故於每門之  
末不敢斷意訖詞篇篇存之將以有望于後之君子云紹  
興十五年五月十七日謹序

少虞自幼喜雜覽家居摘諸史雜史關於風化者纂成此  
篇題曰皇宋事實類苑始於本朝祖宗聖訓終於風土雜  
志總六十三卷少虞不敏何敢爲著述但傳舊而已攷之  
歲月越十四寒暑更俟博洽君子訂焉紹興戊寅九月日

江少虞志

皇朝仕學規範四十卷

明刊本

宋張敏撰

士大夫多媿天資至錯諸行事往往鮮合中道才非不逮  
微法度也前言往行可做可師佩服弗替如循三尺則幼  
學壯行焉往而不中節藐前脩爲易與肆吾意之所嚮跌  
宕乖盭漫亡據依幸而齷齪亡聞人猶以不能恕其如得  
聲名處貴顯有識將起賢者過之之歎斥規矩以覲全材  
屏範模而良器是圖世固無若事也仰惟熙朝累聖續承

一以姬孔道學造天下士名公碩儒聞風作興步武相屬  
其大者功烈在天銘在鼎彝誠未易闕測至如問學之困  
深操行之端方政事之精醇與夫陰功隱德奇辭奧論流  
播簡冊者皆足以擅稱一時詒憲百世茲天資庸樸粗知  
讀書日思拔滌膏粱之習以從賢士大夫後是以寤寐前  
哲採摭舊聞凡言動舉措粹然中道可按爲法程者悉泐  
分鱗次萃爲鉅編以便省閱夫致知必繇學故先之以爲  
學學行之上也故次之行已行已有餘斯可推以及人故  
次之以蒞官爲政莫如德故次之以陰德有德者必有言  
故以詩文終焉謂其皆可爲終身法遂目之曰皇朝仕學  
規範且析爲四十卷庶幾口詠心惟趣向弗譌昭然中庸  
大學之可歎儼乎正人端士之在左右也傳不云乎過者

俯而就不至者跂而及僕方用是自警亦願與同志共之

淳熙歲丙申四月秦川張鎡時可序

右雜纂

愛日精廬藏書志卷二十六



子部

類書類

北堂書鈔一百六十卷

舊抄本

曹棟亭藏書



祕書郎虞世南撰

此本係永興原本未經陳氏增刪

竄亂者分甲乙丙丁戊己庚辛壬癸十冊卷一百三十九  
車總載篇卷一百五十八至一百六十穴泥沙石四篇俱  
係大字無注與全書異陳氏改從一例立題分注遂使原  
本面目不復可識且所增補或羸入五代十國事更失限  
斷藏書家每以不得一觀原書為恨今細核陳氏之書大  
約原書所引之句與題不甚協者則刪絕無文義可通者  
則刪其書人人習讀無所用注者則刪其書世無傳本不

復可校者則刪或改引他書如謝承袁山松等後漢書則改引范蔚宗書十八家晉書則改引房元齡書是也有原本正文而改作小注者有原本小注而改作正文者有陳氏所增而未注補字者有原書所有陳氏稍加增改而注補字者攙亂刪改不可枚舉讀書敏求記云今行北堂書鈔爲吾鄉陳抱中所刻攙亂增改惜無從訂正聞嘉禾收藏家有原書蒐訪十餘年而始得朱氏竹垞大唐類要跋云書賈有以大唐類要求售者反覆觀之卽北堂書鈔也今世所行出常熟陳禹謨刪補盡失其舊儲書者多藏之而原書罕覩矣

欽定四庫全書總目云北堂書鈔明陳禹謨校刻明人好增刪古書逞臆私改其庸妄無識誠有如錢朱二氏所譏然今嘉禾舊本及大唐類要均已不可得見獨禹謨此本猶存其增加各條幸皆注明補字猶有蹤跡可尋惟其所改所刪遂竟不可考是則刊刻之功不贖其竄亂之過矣蓋是書自

國初已極貴重今又更百七十年日久日微幾成斷種合浦之珠豐城之劍不足比其珍貴也前有郡齋讀書志等四則後題嘉靖丙午六月十二日五川居士在萬卷樓記蓋從楊夢羽藏本傳錄者

藝文類聚一百卷

馮氏已蒼校本

唐太子率更令宏文館學士渤海男歐陽詢撰 金吾藏

藝文類聚凡三本一小字本

每頁二十八行二十三字

一蘭雪堂活

字本一聞人詮刊本馮氏已蒼據宋刊本手校卽是本也

三本中以是本爲最善

自序

胡纘宗錢梓序

陸采跋

嘉靖戊子

馮氏手跋曰歲丙子閩人劉履丁贈錢宗伯牧齋以宋刻藝文予從牧翁借按此本始于丁丑之四月畢于六月之十七日是年閏五月蓋百日而終卷也劉本正是此本之祖中有模糊缺矢處無不因襲始知陸采所云劖半之說謬也卷末有葫蘆碧沙印又舊學圖書四字方印未知何家物也屨守居士記

又曰崇禎丁丑借錢宗伯牧齋宋本按過與此本正同劖半之說妄也此書似非全書但宋時已止存此想世無完

本矣馮已蒼書

錢氏手跋曰陸采云劖其半以示存羊意謂胡可泉刻成此書後俗人欲焚此板今劖去以示不忍之意非謂此書之不全也附記于此馮先生必以爲然求赤漫識

太平御覽一千卷

舊抄本

**宋**翰林學士承旨正奉大夫守工部尚書知制誥上柱國隴西縣開國伯食邑七百戶賜紫金魚袋臣李昉等奉敕纂

蒲叔獻重刊跋

慶元五年

李廷允跋

太平御覽殘本六卷

宋刊本

**同上**

存卷二百一至二百五又二百十一凡六卷每葉

二十六行行二十二字吳門周氏藏明文淵閣殘宋本三百六十六卷自一百七十二卷至二百卷又自二百十二卷至三百六十八卷其二百零一至二百十一適闕此本二百零六至二百十以舊抄本補與宋刊本合釘一本或即明文淵閣故物歟

新刊監本冊府元龜一千卷 舊抄本

**宋**推忠協謀同德守正佐理功臣樞密使特進行吏部尚書檢校太尉同中書門下平章事修國史上柱國太原郡開國公食邑七千戶食實封二千八百戶臣王欽若等奉勅纂 標題與北宋本同蓋從北宋本傳錄者闕卷三十四又四十至五十一八百四十九至八百六十五共三十三卷

新刊監本冊府元龜殘本九卷 北宋刊本

**同上** 原一千卷今存卷二百四十九至二百五十四又二百六十一二百六十二二百七十六凡九卷鈐宋璽二日御府圖書日緝熙殿寶鈐明璽一日文淵閣印蓋宋明兩朝內府舊藏本也明中葉以後文淵閣書漸次散失是數卷者歸汲古閣毛氏列之秘本書目年更二百轉易數主故物依然仍歸吾邑謂非有神物護持不至此每頁二十六行行二十四字

冊府元龜殘本四百八十三卷 南宋刊本

**同上** 此南宋重刊本也每頁二十八行行二十四字存卷一百二十九至一百六十六一百七十一至一百八十一百八十二至二百四五百五至五百三十八五百四十一

一 二至五百六十五 五百六十七至五百七十七 五百八十三至五百九十九 六百四至六百五六 六百八至六百六十六 六百六十六至七百一 七百六至七百八十七 七百七至七百二十七 七百二十六至七百三十二 七百三十七至七百三十九 七百四十二至七百五十六 七百六十一至七百九十一 七百九十六至八百八 八百三至八百六十八 八百十一至八百十二 八百十五至八百六十五 八百七十六至九百九百六 九百三十三 九百三十六至九百三十八 九百四十九 九百四十二 九百四十四至九百四十七 九百五十五至九百五十六 九百六十七至一千共四百八十三卷

事物紀原集類二十卷

按宋本致爽閣藏書

宋曾承煥

明刊本十卷按者據宋閩中刊本分二十卷

與直齋書錄解題合卷十四

明刊本卷七

州郡方域門明刊本門作部

驛下按補敕書樓鼓角樓酒務遞鋪四事計二百餘字每

卷俱有毛褒印記或即褒手按歟

閻敬序

正統十二年

李果序

成化八年

賈賓錄十四卷

文瀾閣傳抄本

宋馬永易撰

班左誨蒙三卷

抄本

宋左通奉大夫徽猷閣待制除提舉萬壽觀寶錄院修撰

程俱撰

直齋書錄解題著錄後有紹興三十一年五月

日南劍州雕匠葉昌等鏤板一條

中古以還敘事之文唯左丘明春秋傳太史公記班固漢書最為近古班左得善注故訓詁益明世之人發言下筆終日出其中乃或不知其所謂如館穀跋履遲明傾蓋上下其手富有春秋又若字畫不異而音釋頓殊如三百之百音陌豆區之區音甌搶攘宿留朱提浩壘苟為道聽意讀其不遺笑於人者幾希余於讀書幼而貪故畧中而鈍不得不致詳也詳研孰復乃始懼焉加以羈孤憂懣之餘矧矧病恣間取書至誦閱數紙過反茫然不知為何書比觀二書隨筆之紙既又觀古人用意雖常言細事皆敘載不繁自然爾雅如以孤入母西兵宋百牢我陵者為潘沐巨指之為將指馬字立政曰少公米汁可以沐髮舖之為廡置孫甥之為彌甥與夫古言異字名物制數之微獵取殆盡又以公穀附焉古言如無不祥大焉魯故之以異字如臧藏廩稟忽明舉善奮辟氏首名制數如六畜五性且敘其端而藏於家侵伐滅入鄉亭成旅鞬鞞毳榻之類

名之曰班左誨蒙以謂成學之士當易而哂之髫髻之童將以一二誨之則或有取焉耳政和三年癸巳六月信安程俱致道敘

帝王經世圖譜十六卷

文瀾閣傳抄本

宋唐仲友撰

漢司馬談父子貫穿經傳馳騁古今謂當時六藝已千萬數故有儒者博而寡要勞而少功之言唐韓愈文不絕吟編不停披然亦記事提其要纂言鈎其深矧去古逾遠衆說日繁才學未逮于前賢宜其用力勞而見功微此圖譜所繇作也雖然分門類事者固多其能旁搜遠紹合異為同則鮮矣金華唐仲友字與政于書無不觀于理無不究凡天文地志禮樂刑政陰陽度數兵農王霸皆本之經典

兼采傳注類聚羣分旁通午貫使事時相參形聲相配或推消長之象或列休咎之證而于郊廟學校畿疆井野尤致詳焉各為總說附其後始終條理如指諸掌每一篇成門人金式輒繕寫藏弃積百二十有二篇又得與政猶子別本相與校讐釐為十卷以類相從會分教廬陵將鏤版校官而郡守趙侯善鐫助成之屬予題辭夫水之流東惟海是歸車之指南其塗不迷今是書折衷于聖人示適治之路故名曰帝王經世圖譜非其他類書比也昔漢儒專通一經仍守師說居家用以修身蒞官取以決事況乎六經旨趣百世軌範皆聚于此學者能因之廣記備言精思博考守以卓約則他日見諸行事豈不要而有功也歟與政名臣子少登兩科歷秘書省正字著作佐郎出知信台

二州擢江西提點刑獄孝宗深奇其才不幸得年僅五十三凡所蘊蓄百未究一予每與士大夫共惜之因序其書併告來者嘉泰元年七月庚戌前進士周必大書

新刻歷代制度詳說十二卷 舊抄本

**宋**東萊先生呂祖謙伯恭編撰 板心有怡顏堂鈔書五

彭飛刊板序 秦定三年 殘闕

新箋決科古今源流至論前集十卷後集十卷續集十卷別集十卷 元延祐刊本

**宋**閩川林駟德頌撰別集前進士三山黃履翁吉父編

前集目錄後有延祐丁巳孟冬圓沙書院刊行木記

財貨而費於源流之知德義而取夫源流之喻治不結繩

文 以生三代而來至于我

三千餘年帝

作典章文

未源流

貨德義而已

儒家者流以多聞爲貴以博聞爲高塞胷滿腹頹洞聲味而無條貫或舉其中而不知其本或原其始而不要其終高談有餘待問不足三山先生林君德頌雅有遠度志在邦典博古通今出於生知平居私淑嘗取夫治體之大者約百餘目參古今之宜窮始終之要問而辨之端如貫珠舉而行之審如中鵠嘻有大學問而後有大議論先生以其淹貫之學發而爲經濟之文是非品藻確乎其當昔漢武帝之策仲舒欲叩大道至論先生之論其至論也歟故名之曰古今源流至論以廣其傳焉時嘉熙丁酉三山前

進士黃履翁吉父書

別集序曰昌黎外藁後來所次坡老數論又文集之續者至論之作豈能無遺論耶予擢第西歸又有逐海濱之臭者而求續作伎癢未歇不免復爲之索筆噫斯集果盛傳於世耶予不敢効福時中說以盜人之名果未足重於世耶又安敢爲魏泰碧雲椒嫁惡於人哉故特於篇首言之以自見云癸巳書雲之旦合沙西峯主人黃履翁吉父序

新編分門標題皇鑑箋要六十卷

舊抄本

**宋**閩川林駟德頌撰

取宋一祖十一宗事迹區別事類

分門編纂曰君德曰君政曰官制曰貢舉曰科目曰用人曰臣道曰儒學曰兵制曰賦役曰財用曰荒政曰時弊凡十三門每門又各分類每類爲一篇駟自爲之注盛德豐

功宏綱細目蓋詳哉乎其言之雖揚休播烈未免有意鋪張而一朝政治條分縷析多可與史傳相參是固考宋事者所不廢也其所引書如寶訓實錄國朝會要續會要三朝政要呂源政要增釋高宗聖政九朝通畧蔡龍圖官制官制舊典職源職畧歷代纂議丁未錄等書今皆久佚尤足以資參考是書諸家書目俱未著錄此本尙是明人舊抄總目後有是書鼎新編述與蹈襲塵言者不侔取青之士幸詳鑒三行當是從元刊本影寫者

語人以漢唐聽之者觸屏語人以三國聽之者噴案語人以六朝五代有扼腕不已者姑舍是語之以國朝盛事則聳焉躍焉訢訢焉歛襟肅容之不暇嘻帝王之豐功盛德其感寤人意如此哉余濯纓龍谿日與其徒談前代事有

樞而趨者曰史漢而下飫聞之矣盍觀諸國朝余曰談何容易諸歷典故吾不如趙康靖區別事類吾不如富韓公談何容易既又思之曰聖謨洋洋嘉言孔彰在人耳目藹如也講誦吾職吾不可以已於是會粹所藏日得一二事積之以月巨帙成焉有好事者揭而名之曰皇鑑嘻揚鴻休播芳烈汪汪乎丕天之大律鋪張揚厲余有志焉而未能也姑誦所聞以俟君子嘉定丙子孟夏閩川林駟德頌

序

玉海二百卷附辭學指南四卷

元刊本

**宋** 浚儀王應麟伯厚甫撰

目錄後列慶元路儒學刊造

玉海書籍提調等官銜名

胡助序

至元四年

阿殷圖序

至正十一年

王介序

至正辛卯

李桓序

至元六年

浙東道宣慰使司都元帥府牒

至元三年

重刊增廣分門類林雜說十五卷

舊抄本

吳方山藏書

**金**平陽王朋壽編

分一百門始孝行終禽獸蟲魚每門

各繫以贊其自序曰傳記百家之學散漫不倫難於統紀前賢有區別而為書號曰類林者其來尚矣惜次第失序門類不備予因暇日輒為增廣較之舊書多至三倍云云案新唐書藝文志有于立政類林十卷崇文總目同中興書目云唐于立政類林十卷分五十日記古人事迹見玉海則朋壽此書或因于氏原本增廣歟宜其徵引古籍多有

他書所未載者不僅如讀書敏求記所舉眉間尺一事也原書十卷今本十五卷序云多至三倍者蓋言三分之一多一分耳述古堂書目云王朋壽增補陽休之類林十五卷案北齊書陽休之傳云休之著文集三十卷又撰幽州人物志並行于世未載其著有類林隋志新舊唐書志亦俱無陽休之類林惟新唐書志小說類有裴子野類林三卷遵王或誤記歟是書文淵閣書目著錄近則久無傳本此本係吾郡吳方山舊藏尚是明初人鈔本中遇堯字睿宗皆缺筆陳君子準藏有金刊本明秀集注堯字亦皆缺筆版式亦畧相似則此本殆從大定刊本影寫歟

傳記百家之學率皆有補於時然多散漫不倫難於統紀故前賢有區別而為書號曰類林者其來尚矣惜乎次第

失序門類不備予因暇日輒爲增廣第其次序將舊篇章之中添入事實者加倍又復增益至一百門逐篇係之以贊爲十五卷較之舊書多至三倍若夫人君之聖智聰明臣子之忠貞節義父子兄弟之孝慈友愛將相之權謀大體卿士之廉潔果斷隱遁之潛德幽光文章之麗藻清新風俗之好尚陰德之報應酒醴之耽沉恩怨之報施形軀之長短容貌之美惡男子之任俠剛方婦人之妍醜賢愚神仙之清修鬼神之情狀宮室之華靡屋宇之卑崇天地之運移日星之行度山海之靈潤醫筮之精專草木之奇秀金玉之純良蠻夷之頑獷禽魚之巨細凡六合之內所有無不概舉雖不敢謂之知所未知亦可謂之具體而微矣其於善者不敢加於褒飾惡者不敢遂有貶斥姑取其

本所出處芟其繁節其要而已覽者味其雅正則可以爲法視其悖戾則可以爲戒豈止資談柄而詫多聞不爲無可取也鄉人李子文一見曰專門之學不可旁及至如此書無施不可好學通變之士之所願見我爲君刊鏤以廣其傳如何予謹應之曰諾於是舉以畀之併爲之序皆大定己酉歲夏晦平陽王朋壽魯老序

新編古今姓氏遙華韻九十六卷

抄本

從天一閣舊抄本影

臨川布衣洪景修進可編 是書以姓繫韻凡甲集十

卷乙集十卷丙集十一卷丁集十卷戊集十一卷己集八卷庚集十卷辛集十卷壬集八卷癸集十卷共一千一百八十九姓忠臣孝子義夫烈女相業將畧家法官箴有益民彝世教者必加詳錄其名賢詩文及風流逸事可資談

助者亦間及焉戊集王姓未附載董更生王烈女傳一篇  
備錄全文與全書體例不符是蓋褒揚忠烈俾後世知宋  
社淪亾抗節捐生者自文文山謝豐山諸人外宮禁中尙  
有一王烈女其人也而賣國降臣如傳中所列張晏然陳  
奕范文虎輩讀之亦可少愧矣是殆洪君微意所在故特  
表出之洪君自題臨川布衣意者人元不仕以勝國遺民  
終歟其所引元和姓纂多有出今本外者是亦足資參考  
也文淵閣書目著錄

譜系之學古有專門其書浩如煙海其言雜如軍市至唐  
文帝始刪茹繁濫勒成族志不幸火於邪辭別加紀錄世  
不尊信譜學遂荒洪君進可以韻纂姓以姓萃事臧否小  
大悉所不捐雖有祖述然亦勤且勞矣又却縮衣食錫版

布行其博文之心亦可謂篤矣視終日據案呻其佔畢而  
殊無一字可對人言者亦有逕庭哉惜余眊昏且復病暑  
未能考其著書之旨立言之凡而徒志其太息起敬於篇  
端而已至大三年歲在庚戌立秋後一日庚辰程鉅夫書  
達觀洪先生至元壬午處吾齋三年授受之際見其蟲鏤  
蠶績之書而幼不識何書也至大戊申先生又處吾齋昔  
年書者堆案杳几視之則姓韻成書矣惟我與爾共論衡  
不可請刊以傳廣卽與集工嗟夫先生于是書精神寄於  
歲月之茫茫姓氏承於古今之落落豈洗泮自恣以適己  
將與千金懸之咸陽市門求一字增損王衣妍籍湜敢去  
予是以述此書之本末非跋非序至大元年三月三日門  
人安性仁題

有達尊大雅問僕曰姓氏有初乎曰有姓氏源三皇派春秋渾濁於河南官氏志黃帝二十五子得姓十四春秋國爵無姓十有七有姓無爵十有八富辰曰管蔡邲霍魯衛毛聃郤雍曹滕畢源鄆郇文之昭也邴晉應韓武之穆也凡蔣邢茅胙祭周公之允也或地或官或王父字諡若柳下展氏南宮司馬魯三桓鄭七穆是也魏以拓跋爲長孫邱穆陵爲穆獨孤爲劉弗丑于爲干河南官氏志八姓勳族四姓衣冠列爲著姓梁元時魏九十九姓復如舊于是古今姓氏淆濁滋甚王通謂任薛王劉崔盧之婚非古也何以視譜唐太宗命高士廉岑文本志氏族二百九十三姓首宗室次外戚褒忠良貶姦逆至韋述撰開元譜柳沖撰

氏族系錄宋洪忠宣公撰姓氏指南今孰從而見之僕生晚學膚自咸淳戊辰敦半餘力隨見輒筆積歲月得姓九百有奇抄爲姓氏遙華韻參章定類藁千一百八十九姓無其人者不信不徵鄭夾漈姓氏畧太簡無倫僕起敬忠臣孝子義夫烈女英雄豪傑師友淵源家法官箴相業將畧有益民彝世教必加詳錄其有風流談諧亦可助談資笑開卷思齊自省千載對面又思死節名臣尙宜表章以廣唐人褒忠盛心第慙讀書不多譌舛曷正惟冀達尊大雅特賜矜愚至大元年歲在戊申南呂月吉臨川布衣洪景修進可拜手稽首謹志

漢唐事箋對策機要十二卷後集八卷 元至正刊本

元進士盱黎朱禮德嘉著 是書取漢唐事實有關治體

者分門編載隨事箋釋前集專論漢事後集專論唐事體  
例與源流至論同敘述詳明議論精核蓋將陳往古之治  
道爲當時之法戒不僅供場屋採掇之用也文淵閣書目  
季滄葦書目俱著錄目錄後有至正丙戌日新堂葉木記  
漢唐事要吾友朱君所作也凡其沿革廢置損益更張纖  
息節目有關於治體者罔不領舉而綱提弁包而囊括遡  
流尋源隨事箋注悉有據依一覽之餘了然在目噫是書  
之作豈但場屋計哉學優而仕輔世長民之道不 是  
有志於斯世者苟能鑒漢唐之迹而隆萬世之規庶乎此  
書之傳不爲紙上語耳此吾友以私淑人者也不敢終秘  
用纘之末以廣其傳云時至正元年孟秋之月前進士時  
江南窗謝升孫子順父序

卷二十六終

愛日精廬藏書志卷二十七

子部

小說類

西京雜記二卷 明活字本

丹陽葛洪字稚川集

北夢瑣言二十卷 精抄本

富春孫光憲纂集

自序

北夢瑣言二十卷富春孫光憲纂集唐末後梁後唐石晉  
時事此書乃武林忻悅學家藏陝刊舊本介歸成芥庵夏  
隱君中間刊誤舛訛如日日纂纂歡歎雖難關闕禍福等  
字可以意改餘不敢強以俟別本訂之至正二十四年歲

愛日精廬

次甲辰五月七日寫起至二十七日庚寅輟卷華亭在家  
道人孫道明識于泗北村居映雪齋時年六十又八也連  
日梅雨時雨西南二鄉皆成巨浸豐年未卜今日喜晴聊  
書記耳

東齋紀事五卷補遺一卷

文瀾閣傳抄本

宋范鎮撰

自序曰予嘗與修唐史見唐之士人著書以述當時之事  
後數百年有可考正者甚多而近代以來蓋希矣惟楊文  
公談苑歐陽永叔歸田錄然各記所聞而尚有漏畧者予  
既謝事日子所居之東齋燕坐暇多追憶館閣中及在侍  
從時交游語言與夫里俗傳說因纂集之目爲東齋記事  
其蜀之人士與其風物爲最詳者亦耳目之熟也至若鬼

神夢卜率收錄而不遺之者蓋取其有戒于人耳

青箱雜記十卷

舊抄本

宋朝散郎知漢陽軍吳處厚撰

自序曰前世小說有北夢瑣言酉陽雜俎玉堂閒話戎幕  
閒談其類甚多近代復有閒苑閒錄歸田錄皆采摭一時  
之事要以廣記資講話而已余自筮仕未嘗廢書又喜訪  
問故聞見不覺滋多况復遇事裁量動成品藻亦輒紀錄  
以爲警勸而所紀皆叢脞不次題曰青箱雜記凡一十卷  
元祐二年春正月甲寅日謹序

丞相魏公譚訓十卷

抄本

從子謙姪藏舊抄本傳錄

宋長孫左朝請大夫

蘇象先編

述其祖魏公頌遺訓分

二十六類凡三百餘事

象先自少不離祖父之側元祐丙寅祖父爲天官尚書居西岡楊崇訓之故第祖父以南軒爲書室設大案列書史於前又置小案於椅間俾象先侍坐每至夜分退而記平日教誨之言作談訓百餘事後三年祖父執政無復曩時閒暇又十有二年捐館於潤又十有九年象先在鎮江臥病閱五年當靖康元年偶記舊稿而散失脫落尚多遺逸因廣而續之凡三百餘篇分爲十卷以見一日未常忘祖訓而諄諄之誨不可無傳也

蘇魏公譚訓十卷公之意第欲示訓子孫不祈於傳也必旣得之於公之曾孫無爲判官輝因刻之郡府紹熙癸丑孟夏八月濟南周泌

直齋書錄解題曰蘇氏譚訓十卷朝請大夫蘇象先撰述

其祖魏公頌子容遺訓

續世說十二卷

抄本

從照曠閣藏本傳錄

**宋**魯國孔平仲字毅甫撰

**撰**

是書取宋齊梁陳隋唐歷代

事迹依劉義慶世說之目而分隸之爲書十二卷後有沅州公使庫總計紙板數目并印造紙墨標楮工食錢數目後又有右迪功郎司法兼監使庫翁灌等五人銜名皆沅州官也王士禛居易錄曾載是書云已失傳近代儲藏家亦罕有著錄者此本照曠叔父介何君夢華從宋刊本影寫金吾從之傳錄者

史書之傳信矣然浩博而難觀諸子百家之小說誠可悅目往往或失之誣要而不煩信而可考其世說之躋歟舊本分纂前言以爲要覽畧而未備爰有博雅君子倣而增

廣之此續世說之所以作也學士孔君毅甫平仲囊括諸  
史派引羣義疏剔繁辭揆敘名理釐爲十二卷可謂發史  
氏之英華便學者之觀覽豈曰小補之哉惜其書成未及  
刊行轉相傳寫不無烏焉成馬之弊今茲善本從義郎李  
君敏得之於前靖守王君長孺相與鏤板而藏焉王親授  
於孔知其不謬李今爲沅人徒有其本而所傳蓋未廣也  
紹興丁丑春雒陽王公無染擢守沅之明年郡學鼎新人  
材益進嘗顧謂僚佐曰沅爲郡僻遠史書尤不易備會史  
之要莫善於世說續說又盡善也俄李氏以其書板來售  
卽加是正復命鑱刻以補其不足將俾人得其傳其利溥  
哉此書載言行美惡區以別之學者博古考類擇善而從  
去古人何必有間不但資談說而已然後知公措意豈苟  
然哉後之爲政者能謹其藏勿靳其傳是亦公之用心也  
三月初一日長沙秦果序

直齋書錄解題曰續世說十二卷孔平仲毅父撰編宋至  
五代事以續劉義慶之書

續墨客揮犀十卷

舊抄本 葉石君藏書

**宋彭乘撰**

直齋書錄解題云墨客揮犀十卷續十卷不  
知名氏述古堂書目云彭乘續墨客揮犀十卷伏讀

欽定四庫全書總目云墨客揮犀商濬刻入稗海題彭乘姓名  
蓋以書中自稱名爲據而止有十卷則已佚其續集矣此  
本係明人舊抄亦希覲之書也後有題識云正德己巳歲  
夏日舊刻本摹于志雅齋

歸潛志十四卷

舊抄本

自序

趙穆跋

至大辛亥

靜齋至正直記四卷

舊抄本

**元**關里外史行素居士孔齊著

雜記者記其事也凡所見聞可以感發人心者或里巷方言可為後世之戒者一事一物可為博聞多識之助者隨所記而筆之以備觀省未暇定為次第也至正庚子春三月壬寅記

右雜事

穆天子傳六卷

舊抄本

**晉**郭璞注

前有荀勗序序首有結銜五行云侍中中書

監光祿大夫濟北侯臣勗

行一領中書令議郎上蔡伯臣嶠

言部

行二

祕書主書令史譴勳給

行三

祕書校書中郎張宙

行四

郎中傅瓚校古文穆天子傳已訖謹並第錄

行五

世行本無

此五行案史記索隱引穆天子傳目錄云傅瓚為校書郎與荀勗同校定穆天子傳蓋即指此板心有元覽中區四字蓋秦西巖藏本也

荀勗序

唐闕史二卷

茶夢主人手抄本

**唐**

參寥子高彥休撰

卷首有姚舜咨印記

自序

政和三年秋於東都清平坊傳此書敘云甲辰歲編次蓋唐僖宗中和四年也其間有已書僖號者或後人追改之

彥休敘事頗可觀但過爲緣飾殊有銑谿虬戶體此其贅  
云次年三月七日再閱一過黃長睿父書

凡史載必朝廟典故職員政績雖濫及閭閻亦關風化參  
寥子名曰闕史而事涉瑣細非筆載之急史云乎哉然敷  
敘條暢詞句溫雅唐家小說自別有一種風趣參寥子唐  
高彥休乾符中人姑蘇吳岫

右異聞

酉陽雜俎二十卷 元刊本

**唐**臨淄段成式撰

自序

古杭雜記詩詞集四卷 精抄本

**元**李有撰

目錄後有識語云已上係宋朝遺事一新繡

梓求到續集陸續出售與好事君子共之

右瑣記

愛日精廬藏書志卷二十七終

愛日精廬藏書志卷二十八

子部

釋家類

釋迦譜十卷

明支那本

蕭齊釋僧祐撰

述釋迦降胎至分塔披經按記原始要

終爲譜記十卷三十四篇

自序曰蓋聞菩提之爲極也神妙寂通圓智湛照道絕於形識之封理畢於生滅之境形識久絕豈實誕於王宮生滅已畢宜真謝於堅固哉但羣萌長寢同歸大覺緣來斯化感至必應若應而不生誰與悟俗化而無名何以導世是以標號釋迦擅種利利體域中之尊冠人天之秀然後脫屣儲宮貞觀道樹捨金輪而御大千明玉毫而制法界

此其所以垂跡也爰自降胎至於分塔瑋化千條靈瑞萬  
變並義炳經典事盈記傳而羣言參差首尾散出事緒舛  
駁同異莫齊散出首尾宜有貫一之區莫齊同異必資會  
通之契故知博訊難該而總集易覽也祐以不敏業謝多  
聞時因疾隙頗存尋翫遂乃披經按記原始要終敬述釋  
迦譜記列爲十卷若夫允裔託生之源得道度人之要泥  
洹塔像之徵遺法將滅之相總衆經以正本綴世記以附  
末使聖言與俗說分條古聞其今跡相證萬里雖邈有若  
躬踐千載誠隱無隔面對今抄集衆經述而不作庶脫尋  
訪力半功倍敬率丹心畧敷誓願

宏明集十四卷

明支那本

梁釋僧祐撰

自序曰余所集宏明爲法禦侮通人雅論勝上妙說摧邪  
破惑之衝宏道護法之塹亦已備矣然智者不迷迷者乖  
智若導以深法終於莫領故復撮舉世典指事取徵言非  
榮華理歸質實庶迷塗之人不遠而復總釋衆疑故曰宏  
明論云夫二諦差別道俗斯分道法空寂包三界以等觀  
俗教封滯執一國以限心心限一國則耳目之外皆疑等  
觀三界則神化之理常照執疑以迷照羣生所以永淪者  
也詳檢俗教並憲章五經所尊唯天所法唯聖然莫測天  
形莫窺聖心雖敬而信之猶朦朦弗了况乃佛尊於天法  
妙於聖化出域中理絕繫表肩吾猶驚怖於河漢俗士安  
得不疑駭於覺海哉既駭覺海則驚同河漢一疑經說迂  
誕大而無徵二疑人死神滅無有三世三疑莫見真佛無

益國治四疑古無法教近出漢世五疑教在戎方化非華俗六疑漢魏法微晉代始盛以此六疑信心不樹將溺宜拯故較而論之若疑經說迂誕大而無徵者蓋以積劫不極世界無邊也今世咸知百年之外必至萬歲而不信積萬之變至於曠劫是限心以量造化也咸知赤縣之表必有四極而不信積極之遠復有世界是執見以判大虛也昔湯問革曰上下八方有極乎革曰無極之外復無無極無盡之中復無無盡朕是以知其無極無盡也上古大賢據理訓聖千載符契懸與經合并識之徒何智得異夫以方寸之心謀已身而致謬圓分之眸隔牆壁而弗見而乃侮尊經背聖說誣積劫罔世界可爲愍傷者一也若疑人死神滅無有三世是自誣其性靈而蔑棄其祖禰也然則

周孔制典昌言鬼神易曰游魂爲變是以知鬼神之情狀旣情且狀其無形乎詩云三后在天王配于京升靈上旻豈曰滅乎禮云夏尊命是鬼敬神大禹所祇虛誕乎書稱周公代武云能事鬼神姪且禱親可虛罔乎苟亡而有靈則三世如鏡變化輪回孰知其極俗士執禮而背叛五經非真誣佛亦侮聖也若信鬼於五經而疑神於佛說斯固聾瞽之徒非議所及可爲哀矜者二也若疑莫見真佛無益國治則禮祀望秩亦宜廢棄何者蒼蒼積空誰見上帝之貌茫茫累塊安識后祇之形民自躬稼社神何方人造庸啜蜡鬼奚功然猶盛其犧牲之費繁其歲時之記者豈不以幽靈宜尊教民羨報耶況佛智周空界神凝域表上帝成天緣其陶鑄之慈聖王爲人依其亭育之戒崇法

則六天咸喜廢道則萬神斯怒今人莫見天形而稱郊祀  
有福不覩金容而謂敬事無報輕本重末可爲震懼者三  
也若疑古無佛教近出漢世者夫神化隱顯孰測始終哉  
尋羲農緬邈政績猶湮彼有法教亦安得聞之昔佛圖澄  
知臨淄伏石有舊像露盤犍陀勒見槃鴉山中有古寺基  
庶衆人試掘並如其言此萬代之遺徵晉世之顯驗誰判  
上古必無佛乎列子稱周穆王時西極有化人來入水火  
貫金石反山川移城邑乘虛不墜觸實不礙千變萬化不  
可窮極既能變人之形又且易人之慮穆王敬之若神事  
之若君觀其靈跡乃閔土之化大法萌兆已見周初感應  
之漸非起漢世而封執一時可爲歎息者四也若疑教在  
戎方化非華夏者則是前聖執地以定教非設教以移俗

也昔三皇無爲五帝德化三王禮形七國權勢地當諸夏  
而世教九變今反以至道之源鏡以大智之訓感而遂通  
何往不被夫禹出西羌舜生東夷孰云地賤而棄其聖某  
欲居夷聘適西戎道之所在宜選於地夫以俗聖設教猶  
不繫於華夷況佛統大千豈限化於西域哉案禮王制云  
四海之內方三千里中夏所據亦已不曠伊洛本夏而鞠  
爲戎墟吳楚本夷而翻成華邑道有運流而地無恒化矣  
且夫厚載無疆寰域異統北辰西北故知天竺居中今已  
區分中土稱華以距正法雖欲距塞而神化常通可爲悲  
涼者五也若疑漢魏法微晉代始盛者道運崇替未可致  
詰也尋沙門之修釋教何異孔氏之述唐虞乎孔修五經  
垂範百王然春秋諸侯莫肯遵用戰伐蔑之將墜于地爰

至秦皇復加燔燼豈仲尼之不肖而詩書之淺鄙哉邇及漢武始顯儒教舉明經之相崇孔聖之術益可以見輕七國而遂廢後代乎案漢元之世劉向序仙云七十四人出在佛經故知經流中夏其來已久逮明帝感夢而傳毅稱佛於是秦景東使而攝騰西至乃圖像於關陽之觀藏經於蘭臺之室不講深文故莫識奧義是以楚王修仁潔之祠孝桓建華蓋之祭法相未融唯神之而已至魏武英鑒書述妙化孫權雄畧崇造塔寺晉武之初機緣漸深耆域耀神通之跡竺護集法寶之藏所以百辟縉紳洗心以進德萬邦黎憲刻意而遷善暨晉明叡悟秉壹棲神手畫寶像表觀樂覽既而安上宏經於山東什公宣法於關右精義既敷實相彌照英才碩智並驗理而伏膺矣故知法雲

始於觸石慧水流于濫觴教必有漸神化之常感應因時非緣如何故儒術非愚於秦而智於漢用與不用耳佛法非淺於漢而深於晉明與不明耳故知五經恒善而崇替隨運佛化常熾而通塞在緣一以此思可無深惑而執疑莫悟可爲痛悼者六也夫信順福基迷謗禍門而況矇矓之徒多不量力以己所不知而誣先覺之徧知以其所不見而罔至人之明見鑒達三世反號邪僻事拘目前自謂明智於是迷疑塞智謗讟盈口輕議以市重苦顯誅以賈幽罰言無錙銖之功慮無毫釐之益逝川若飛藏山如電一息不還奄然後世報隨影至悔其可追夫神化茫茫幽明代運五道變化于何不之天官顯驗趙簡秦穆之錫是也鬼道交報杜伯彭生之見是也修德福應殷代宋景之

驗是也多殺禍及白起程普之證是也現世幽微備詳典籍來生冥應布在尊經但緣感理奧因果義微微奧難領故畧而不陳前哲所辨關鍵已正聊率鄙懷繼之于末雖文非瑋璋而事足鑿鑑惟愷悌君子自求多福焉

高僧傳十四卷

舊抄本

梁會稽嘉祥寺沙門慧皎撰 採自漢至梁六代高僧分爲十科曰譯經曰義解曰神異曰習禪曰明律曰遺身曰誦經曰興福曰經師曰唱導凡二百五十七人

自序曰原夫至道冲漠假蹄筌而後彰元致幽凝藉師保以成用是由聖迹迭興賢能異託辯忠烈孝慈以定名教之道明詩書禮樂以成風俗之訓或忘功遺事尚彼虛冲或體任榮枯重茲達命而皆教但域中功在近益斯蓋漸

染之方未與盡其神性至若能仁之爲訓也考業果之幽微則循復三世言至理之高妙則貫絕百靈若夫啟十地以辯慧宗顯三諦以詮智府窮神盡性之旨管一樞極之致餘方亦猶羣流之歸巨壑衆星之拱北辰懋哉邈矣信難得以言尙至迺教滿三千形遍六道皆所以接引幽昏爲大利益而以淨穢異聞昇墜殊見故秋方先音形之奉東國後見聞之益雲龍表於夜明風虎彰乎宵夢洪風旣扇大化斯融自爾西域名僧徃徃而至或傳度經法或教授禪道或以異迹化人或以神力拯物自漢之梁紀歷彌遠世踐六代年將五百此土桑含章秀發群英間出迭有其人衆家記錄敘載各異沙門法濟偏敘高逸一跡沙門法安但列志節一行沙門僧寶止命遊方一科沙門法進

廼通撰論傳而辭事闕畧並皆互有繁簡出沒成異考之  
行事未見其歸宋臨川康王義慶宣驗記及幽明錄太原  
王爻冥祥記彭城劉俊益部寺記沙門曇宗京師寺記太  
原王延秀感應傳朱君台徵應傳陶淵明搜神錄並傍出  
諸僧敘其風素而皆是附見亟多疎闕齊竟陵文宣王三  
寶記傳或稱佛史或號僧錄既三寶共敘辭旨相關混濫  
難求更爲蕪味琅琊王巾所撰僧史意似該綜而文體未  
足沙門僧祐撰三藏記止有三十餘僧所無甚衆中書郗  
景興東山僧傳治中張孝季廬山僧傳中書陸明震沙門  
傳各競舉一方不通今古務存一善不及餘行逮于卽時  
亦繼有作者然或褒贊之下過相揄揚或敘事之中空引  
辭費求之實理無的可稱或復嫌以繁廣刪減其事而抗  
迹之疇多所遺削謂出家之士處國賓王不應勵然自遠  
高蹈獨絕辭榮棄愛本以異俗爲賢若此而不論忘何所  
紀嘗以暇日遍覽群作輒搜檢雜錄數十餘家及晉宋齊  
梁春秋書史秦趙燕涼荒朝僞歷地理雜篇孤文片記并  
博諮故老廣訪先達校其有無取其同異始于漢明帝永  
平十年終至梁天監十八年凡四百五十三載二百五十  
七人又傍出附見者二百餘人開其德業大爲十例一曰  
譯經二曰義解三曰神異四曰習禪五曰明律六曰遺身  
七曰誦經八曰興福九曰經師十曰唱導然法流東土蓋  
由傳譯之勲或踰越沙險汎漾洪波皆亡形殉道委命宏  
法震且開明一焉是賴茲德可崇故列之篇首至若慧解  
開神則道兼萬億通感適化則彊暴以綏靖念安禪則功

德森茂宏贊毗尼則禁行清潔忘形遺體則矜吝革心歌  
誦法言則幽顯含慶樹興福善則遺像可傳凡此八科並  
以軌迹不同化洽殊異而皆德効四依功在三業故爲羣  
經之所稱美衆聖之所褒述及夫討覈源流商榷取捨皆  
列諸贊論備之後文而諸所著辭微異恒體始標大意類  
猶前序未辯時人事同後儀若間施前後如謂煩雜故摠  
布一科之末通稱爲論其轉讀宣唱原出非遠然而應機  
悟俗實有偏功故齊宋雜記咸條列秀者今之所取必其  
製用超絕及有一分通感乃編之傳末如或異者非所存  
焉凡十科所敘皆散在衆記今止刪聚一處故述而無作  
俾夫披覽於一本之內可兼諸要其有繁辭虛贊或德不  
及稱者一皆省畧故述六代賢異止爲十三卷并序錄合

十四軸號曰高僧傳自前代所撰多曰名僧然名者本實  
之賓也若實行潛光則高而不名寡德適時則名而不高  
名而不高本非所紀高而不名則備今錄故省名音代以  
高字其間草創或有遺逸今此十四卷備贊論者意以爲  
定如未隱括覽者詳焉

右此傳是會稽嘉祥寺釋慧皎法師所撰法師學通內外  
精研經律著沮槃疏十卷梵網戒等義疏並爲世軌又撰  
此高僧傳及序共十四卷梁末承聖二年太歲癸酉避侯  
景難來至湓城少時講說甲戌歲二月捨化春秋五十有  
八江州僧正慧恭爲首經營葬于廬山禪閣寺墓時龍光  
寺釋僧果同避難在山遇見時事聊記之云耳

唐釋道宣撰

釋迦方志三卷

明支那本

**唐**終南太一山釋氏道宣撰 分八篇曰封疆曰統攝曰

中邊曰遺跡曰游履曰通局曰時任曰教相

自序

集古今佛道論衡實錄四卷續集一卷

明支那本

唐釋道宣撰**續集**唐沙門智昇撰 集漢至唐佛道角試

論辨事

自序

大慈恩寺三藏法師傳十卷

明刊本

**唐**沙門慧立本釋彥棕箋 卷一至五紀元奘西游所歷

諸國卷六至十紀元奘西歸自貞觀十九年入西京至麟

德元年捨化其間崇奉恩禮并備載詔敕碑記經序謝表

書啟等文

彥棕序

集沙門不應拜俗等事六卷

明支那本

唐宏福寺沙門釋彥棕纂錄 集東晉至唐議沙門不應

拜俗等文凡詔敕表狀書啟論議答難按代編載分三篇

曰故事篇明隋以上沙門致敬等事也曰議不拜篇明沙

門不應拜俗也曰議拜篇明沙門應致拜也

王隱容序

開元釋教錄二十卷

明支那本

唐崇福寺沙門智昇撰

自序

大方廣佛華嚴經音義四卷

明支那本

唐京兆靜法寺沙門慧苑述 是書與翻譯名義徵引儒書甚夥足爲稽古之助詳臧君跋

自序

大方廣佛華嚴經音義四卷唐京兆靜法寺沙門慧苑撰近同里孫淵如編輯蒼頡篇興化任幼植主事輯字林徵引一切經華嚴經音義而二書始見知於世唐志載元應衆經音義二十五卷而慧苑書未著錄余見而嗜之手自纂錄凡屬梵言悉從省節有涉儒義並列簡編仍存其卷第篇目俾後人可考也或謂慧苑學識不及元應之精其書亦遠遜時余方寫定韓詩試以此書所引之韓詩傳論之以明其可貴焉有云墀猶坦因知作東門之壇者爲

毛詩作東門之墀者爲韓詩今詩作墀因定本而誤定本作墀因韓詩而改釋文正義開成石經固皆作壇也又云遭遇也此卽遭我乎狺之閔兮傳毛氏無之又云烟謂燒草傳火焰盛也按毛詩蘊隆蟲蟲釋文謂韓詩蟲作烟正合此皆釋文正義後漢書注文選注諸書所未引者叔在藪釋文引韓詩禽獸居之曰藪爲節引此引澤中可禽獸居之曰藪爲原文嘉定錢辛楣少詹輯風俗通逸文而此引云天子治居之城曰都舊都曰邑春秋之末鄭有賢人著書一篇號鄭長者謂年長德艾事長於人以之爲長者故也皆錢本所無至錢本有之而文或節轉不如此引爲完善者尚多餘若引劉子珪周易義疏王子雍尚書傳劉光儀禮注蔡伯喈月令章句服子慎左氏解詁賈景伯國

語解詁鄭氏孝經注劉成國孟子注皆今日已亡之經部也若張揖埤蒼李登聲類揚承慶字統葛洪字苑服虔通俗文李彤字指阮孝緒文字集略漢書音義皆今日已亡之小學家也每稱珠叢韻圃按唐書藝文志載諸葛穎桂苑珠叢一百卷桂苑珠叢畧要三十卷儒林傳上煬帝令曹憲與諸儒撰桂苑珠叢規正文字而韻圃無考餘引漢魏古籍尙夥亦可以見此書之足貴矣此定當與一切經音義並傳又何可爲之較短絜長哉惜此本出鈔胥手未及學士勘對故脫誤甚衆余正其可知者而闕其不可知者未審何日得藏本細校并付梓以公海內也時乾隆癸丑仲冬十七日武進臧鏞堂識於金閶袁氏拜經閣

鏞堂寓吳門時故友王西林爲畢秋帆宮保掌守經典從之索借唐以前遺書西林以華嚴經音義四卷寫本見示蓋宮保撫陝右時所得釋藏本也讀之如獲一海外奇珍旬日閒盡纂錄之鈕君匪石與余同好每纂一卷成匪石隨取披讀並勘正其誤謬援引證據羅列上下方時卽欲刊布而未能後宮保撫山左招鏞堂課孫學使阮芸臺少司農一見首問此書以手錄本呈閱司農曰善當卽以此本付梓并出北藏板二卷屬爲校讐始知西藏本爲後人竄改遠不及北藏本之真竊幸素願可酬而宮保頗好佛老家言謂當以完書開雕並許爲刻先高祖經義雜記旣而仍督兩湖死於軍事皆不果今來粵東爲司農校刊經籍纂詁始自夙意爲之稽元應唐貞觀閔人而慧苑無考此書引李善文選注歐陽詢藝文類聚則在元應之後蓋

生唐之中葉者也其論字體往往與今異趣一則慧苑所據唐籍與時本不同二則秦漢隸書既行晉宋六朝咸多俗體均未可以今本說文繩尺之茲悉以北藏爲正惟顯係傳寫之譌者甫敢改正餘並闕疑以俟能者通之噫自慧苑撰述以來千有餘年矣沈霾釋藏世無知者幸

本朝文運天開有好學深思之人旁搜二典徵引此書此書始見知於世倘及今不爲之傳布一旦亡逸深可憫矣鏞堂衣食不遑恤而孜孜於此不敢視爲不急之務也有與我同志者亦無隱也時嘉慶四年九月一日鏞堂後序於南海古藥洲

紹興重雕大藏音三卷

明支那本

宋精嚴寺沙門處觀集 以唐韻集韻郭迒大藏音爲本

凡傳寫破體皆爲辨正始人部終雜部凡一百七十四部  
柳豫序曰豫待次銓衡晦跡里閤得以優游僧舍尋訪開  
士有精嚴寺觀上座惠然見訪曰處觀落髮學佛未能明  
了智慧願讀一大藏教以純熟般若然而卷軸浩渺義理  
淵奧常患字畫舛誤音義疎畧窮日累月尋繹不暇雖精  
進勉強而常恐有所不逮而又反思吾徒凡有志者未始  
不以此爲患也昔瑠法師嘗著音釋附於函末而其文不  
詳備先後失次披閱之際未免凝滯故處觀不量淺昧討  
論集韻洎唐宋二韻郭迒衆經音又嘗訪求別本搜索偏  
旁發明義例遍閱者幾十數藏讎校者餘二十年始於熙  
寧庚戌歲而成於元祐癸酉孟冬月凡一百七十四部分  
爲上中下三卷欲以精嚴新集大藏音爲標目其間如刪

槐則才木不辯彼慌則巾小不分搏搏惕惕衣示日日則  
筆畫差互文理混淆又畧分五種釐有七樣此類至繁不  
可槩舉皆由書生傳寫破體者多對讀滅裂辯正者少今  
一切別白於逐字之下使觀者得以考信而無探討之勞  
亦庶幾有補於吾道也嚮聞君有志於外護久矣願求序  
引冠之篇首幸無辭焉豫敬聞之曰諾豫早歲棲心空門  
耽味禪悅嘗有志願徧閱內典而中間事物侵擾相仍憂  
患不知老之將至曾未能涉獵一二况欲縱橫貫穿於妙  
道之域耶自非屏跡息緣焦心勞思積以歲月詎能從吾  
之所好故遊經藏則作禮恭敬視讀誦則隨喜讚歎又况  
勤苦方便利樂學者有如吾師則敢不詳言之以取信於  
後人亦所以成吾之志也元祐九年四月初五日序

翻譯名義集二十卷

明支那本

宋姑蘇景德寺普潤大師法雲編

周敦義序曰余閱大藏嘗有意效崇文總目撮取諸經要  
義以爲內典總目見諸經中每用梵語必搜檢經教具所  
譯音義表而出之別爲一編然未及竟而顯親深老示余  
平江景德寺普潤大師法雲所編翻譯名義余一見而喜  
曰是余意也他日總目成別錄可置矣已而過平江雲遂  
來見願求敘引余謂此書不惟有功於讀佛經者亦可護  
謗法人意根唐奘法師論五種不翻一祕密故如陀羅尼  
二舍多義故如薄伽梵具六義三此無故如閻浮樹中夏  
實無此木四順古故如阿耨菩提非不可翻而摩騰以來  
常存梵音五生善故如般若尊重智慧輕淺而七迷之作

乃謂釋迦牟尼此名能仁能仁之義位卑周孔阿耨菩提  
名正徧知此土老子之教先有無上正真之道無以爲異  
菩提若埽名大道心衆生其名下劣皆掩而不翻夫三寶  
尊稱譯人存其本名而肆爲謗毀之言使見此書將無所  
容其喙矣然佛法人中國經論日以加多自晉道安法師  
至唐智昇作爲目錄圖經蓋十餘家今大藏諸經猶以昇  
法師開元釋教錄爲準後人但增宗鑑錄滄苑珠林於下  
藏之外如四卷金光明經摩訶衍論及此土證道歌尚多  
有不入藏者吾國家嘗命宰輔爲譯經潤文使所以流通  
佛法至矣特未有一人繼昇之後翻譯久遠流傳散亡真  
曆相乘無所考據可重歎也雲雖老矣尚勉之哉紹興丁  
丑重午日序

釋氏稽古畧四卷

元刊本

釋覺岸寶洲編集

吳興有大比丘曰寶洲岸公博學通古今嘗考釋氏事實  
上下數千載年經而國緯著書一編曰稽古手鑑旣又以  
爲未備復因其舊輯而廣之爲稽古畧至正十四年秋九  
月太原劉堯輔爲之持其書請於余爲序以冠其編首因  
取而閱之蓋自有佛以來凡名師大德之行業出處以及  
塔廟之興壞僧侶之衆置靡不具載本之內典參之諸史  
旁及於傳記而間以事之著顯者爲之據將以侈歷代之  
際遇而寓勸戒於其間歲月先後攷覈精審無所遺闕可  
謂贍且詳矣然猶以畧名之寶洲自謙也竊嘗怪夫佛之  
爲教自身毒萬里遠至於中國愈久益盛根本深固而不

可搖拔其故何也豈非扶植其教者代有其人與若是編之所記往往皆英偉魁傑之才自重不屈卓然有立而使王公卿大夫向慕崇信奔走之不暇則其扶植之功爲何如此師所以加之纂述表而出之之意也傳之言曰道不同不相爲謀佛氏之書非余之所學余特嘉其聞見之博用心與力之勤道雖不同而不可以不序嗚呼觀其書而見其教之盛知彼之扶植爲有人則亦可以有感也夫中山李桓序

辨僞錄五卷

明支那本

元雲峯禪寺沙門祥邁奉勅撰

辨老君化胡成佛經及

八十一圖之僞

道家類

道德真經傳四卷

抄本

從道藏本傳錄

**唐**吳郡陸希聲傳

前有自序大意謂老氏之道同於夫

子故夫子嘆爲猶龍從之問禮無間然後世不能通其意妄爲區別致其道不甚顯於世此注者之罪也因作此傳以發明其指歸雖未免援儒入墨然探本窮源研幾索隱推性命之極闡道德之奧俾老氏之微言大義昭昭然與聖人之道同符是亦老氏之功臣矣故錄存之

自序

沖虛至德真經八卷

元刊本

季滄葦藏書

**晉**張湛處度注

自序

纂圖互注南華真經十卷

元刊本

晉郭象子元注唐陸德明音義 板心有刻工姓名如張  
輝景亨文顯文富余以正等名蓋猶沿宋板舊式也

自序

南華真經新傳二十卷

舊抄本

宋王雱元澤傳

無名氏刊板序曰王元澤待制莊子舊無完解其見傳於  
世者止數千言而已元豐中始得完本於西蜀陳襄氏之  
家其間意義淵深言辭典約向之無說者悉皆全備焉予  
是時銳意科舉思欲獨善遂藏篋笥蓋有歲年前一日賓  
友謂予曰方今朝廷復以經術造士欲使天下皆知性命  
道德之所歸而莊子之書實載斯道而王氏又嘗發明奧  
義深解妙旨計其爲書豈無意於傳示天下後世哉今予

旣得王氏之說反以祕而不傳則使莊氏之旨終亦晦而  
不顯也與其獨善於一身曷若共傳於天下與示後世乎  
予敬聞其說乃以其書親加校對以授於崔氏之書肆使  
命工刊行焉丙子歲季冬望日序

自序曰世之讀莊子之書者不知莊子爲書之意而反以  
爲虛怪高濶之論豈知莊子患拘近之士不知道之始終  
而故爲書而言道之盡矣夫道不可盡也而莊子盡之非  
得已焉者也蓋亦矯當時之枉而歸之於正故不得不高  
其言而盡於道道之盡則入於妙豈淺見之士得知之宜  
乎見非其書也吾甚傷不知莊子之意故因其書而解焉

通元真經續義十卷

舊抄本

南谷子杜道堅纂

四庫全書著錄本從永樂大典錄

出缺道原九守道德上仁上禮五篇此則舊抄足本也  
文子者道德經之傳也老子本易而著書文子法老而立  
言所以發明皇帝王伯之道欲爲君者必義軒之君爲民  
者皆大庭葛天之民其垂意於世亦深矣後人莫究或相  
詆訾今南谷杜高士探易老之頤合儒老之說每以著書  
立言爲心其行于世者有道德原旨若干卷初居吳興計  
籌山探奇訪古得文子故居之地剏白石通元觀復得文  
子全書遂爲析篇章分句讀續義附說使學者日擊道存  
子嘗謂乾坤開闢之後天道自北而南聖朝肇基朔方元  
運一轉六合爲家洪荒之世復見今日南谷應運著書以  
昭皇道將措斯世於華胥氏之域山林士不忘致君澤民  
之心誠可尚也吾教有人喜而才其端云王大三年六月  
且日元教嗣師吳全節敬序

古之士用人家國必有世外隱者爲之師磨礪淬厲受其  
書盡其道然後功成而名立越有上將軍范蠡其師爲計  
然計然親見聖人於衰周懷至寶而不耀嘗究觀天道人  
事強弱興廢自然之理著書十有二篇蠡用之平吳而霸  
越又以其緒餘全身肥家三積三散保其令名觀蠡之始  
終以信其師之道觀蠡屢對勾踐之言皆其師之言也其  
書於諸子爲道家柳子厚芟除冗駁掇取精微自爲一書  
頗發其意惜不傳南谷先生按圖以得計然舊居之山踞  
高峰之峻峙俯具區之渺瀰旣爲之築室肖象復取文子  
作續義融會貫通削險就夷發舒皇帝王伯之蘊與所著  
先經原旨並行於代先生有道者其清勤儉素不爭而善

勝深得柱下宗旨立言立事見於薦紳韋布之所論著固已勤堅石而鏤華梓矣抑太史公之論陶朱謂其苦身戮力與越深謀又謂苦身戮力致產數千萬復言之不厭先生於此事異而同其功名高而不享其富則其所以得於計然之書者豈在文字章句之末去之千載真有若合符契者焉獨恨名卿大夫知先生者多登門問道不少迺未能盡用其說如古人之謀國豈信道之末篤歟山林之士不忘斯世肉食其忘之歟不然所以尊吾老子之道者何所爲而然也余故表記范師友之所從受于篇端以俟至大庚戌仲夏廬山道山寓南真館黃石翁序

古之君天下者太上無爲其次有爲是故皇以道化帝以德教王以功勸伯以力率四者之治若四時焉天道流行

固非人力之能強然則時有可行道無終否冬變而春存乎歲伯變而皇存乎君此文子作而皇道昭矣文子晉之公孫姓辛氏名鉞字計然文子其號家睢之葵丘屬宋地一稱宋鉞師老子學早聞大道著書十有二篇曰文子歸本老子之言歷陳天人之道時變之宜萃萬古於一編誠經世之樞要也楚平王聘而問道范蠡從而師之勾踐位以大夫佐越平吳功成不有退隱封禹之地登雲仙去吳興計籌之陽乃其故處唐元宗時徵士徐靈府隱修衡嶽注文子之書上進遂封通元真人號其書爲通元真經僕生江左身老吳邦訪文子之遺踪建白石通元觀因獲文子故編暇日分章續義參贊元風若夫化教勸率道德功力之辯則不無望於世之大賢云爾後學當塗南谷子杜

道堅謹序

愛日精廬藏書志卷二十八終

愛日精廬藏書志卷二十九

集部

楚詞類

離騷草木疏四卷

宋慶元刊本

焦弱侯藏書

**宋**

通直郎充國子錄河南吳仁傑撰

焦弱侯徐健菴俱

有印記

自序 慶元丁巳

方燦跋 慶元庚申

別集類

蔡中郎文集十卷外傳一卷

蘭雪堂活字本

漢左中郎將蔡邕伯喈撰

漢蔡中郎傳邕博學辭章為靈紀十裔及諸雜文章凡百



四篇傳於世傳所載者釋誨幽冀刺史闕所陳政要七事  
金商門答災異疏被收時表及世傳獨斷女訓文選陳太  
丘等碑文初學記短人賦纔十數篇而已按唐書藝文志  
洎吳氏西齋書目並云邕集十五卷今之所傳纔十卷亡  
外計六十四篇其中可疑者宗廟頌贊述武皇平亂之功  
又有昊天眷佑我魏之句以魏宗廟也又有魏武帝祠喬  
太尉文稱丞相冀州收魏主操謹遣掾再拜祠文姜伯淮  
碑稱建安二年又平劉鎮南碑建安十三年薨太和二年  
葬按邕傳本董卓被誅邕爲王允所害時年六十一據邕  
金商門答災異被收表云臣今年四十八靈帝光和元年  
也董卓被誅獻帝初平三年也光和元年戊子至初平三  
年壬申邕正六十一矣又初年盡四年改興平二年改建  
安至五年正月薨操薨三月改延康十月禪于魏王丕卽  
初平四年是爲二十六年太和二年乃魏明帝之二年至  
是又八計邕死已三十六年矣按初平已前操尙在誅卓  
之歲操始爲東郡太守破黃巾於壽張至建安十三年操  
自爲丞相二十一年操自進爲魏王亦有魏宗廟而操不  
得先稱魏王武帝及武皇也其姜伯淮鎮南薨葬相後年  
代差遠邕安得紀述耶是集也今旣缺五卷矣見所傳者  
蓋後之好事者不本事迹編他人之文相混之耳非十五  
卷之本編固矣建安黃初之文體多相類復不逮廣被衆  
集固不可知其誰之作也偶閱而有得識于帙末天聖紀  
號龍集癸亥余月哉生明後八日海陵西齋平陽歐靜識  
之序

曹子建集十卷

明活字本

魏陳思王曹植撰

嵇中散集十卷

明嘉靖刊本

魏嵇康撰

陸士衡文集十卷

明正德刊本

晉平原內史吳郡陸機士衡撰

二俊集序曰民瞻幼閱晉陸機士衡傳太康末士衡與弟雲士龍俱入洛造太常張華華素重其名一見如舊識曰伐吳之役利獲二俊嘗伸卷反覆求二俊所以名於世者張華所以稱道而有得士之喜者觀之蓋其兄弟以文章齊驅並駕於兵戈擾攘之間聲聞閎肆人無能出其右者時號二陸華聞服之久一旦驟得之宜其欣慰而稱道之

也吁二俊沒寥寥且千載其人不可得而見矣其文章所謂如朗月之垂空重巖之積秀者固自若也耳目可無所見聞乎其載於文選諸書中者亦多卽而熟讀之其詞深而雅其意博而顯遠超枚馬高躡王劉百代之文宗也每以未見其全集爲恨聞之鄉老曰士衡有集十卷以文賦爲首士龍集十卷以逸民賦爲首雖知之求之未遂偶因乏使承雲間民社之寄二俊雲間人也拜命之日良慰于中謂平素願見而不可得者遂於此行矣到官之初首見遺像於吏舍之旁塵埃漫污曖昧殊甚大非所以揭虔妥靈之本意卽日闢縣學之東偏建祠宇奉以遷焉邦人觀瞻無不懽喜稱嘆因訪其遺文於鄉曲得士衡集十卷于新淮西撫幹林君其首篇冠以文賦士龍集十卷則無之

明年移書故人祕書郎鍾君得之于冊府首篇逸民賦悉如所聞亟繕寫命工鈐之木以行日曰晉二俊文集二俊之文自晉歷隋唐更五代迄于我宋又二百四十餘年湮沒不彰今焉恍如揭日月于雲霧之上震雷霆于久息之中焜燿雲間雲間學士大夫宗之仰之有餘師矣二俊之名不朽矣民瞻之欲遂矣又明年書成謹述于篇首慶元庚申仲春既望信安徐民瞻述

都穆重刊跋

正德己卯

陸士龍文集十卷

明正德刊本

晉清河內史陸雲士龍

都穆重刊跋

正德己卯

陸士龍文集十卷

影寫宋刊本

晉清河內史陸雲士龍

撰

二俊文集以慶元六年二月既望書成縣學職校正監刊者三員題名于后

縣學司計進士朱奎監刊

縣學直學進士孫垓校正

縣學學長鄉貢進士范公衮校正

鮑氏集十卷

舊抄本

毛氏斧季手校

宋鮑照

毛氏從宋刊本手校虞炎序上方有識語云

宋本每幅廿行每行十六字小字不等卷一舞鶴賦巾拂兩停九劍雙止上識語云欽宗諱桓故宋本書九字諱去一點犯嫌名也然字形狹長仍作九字形而缺一點與九字不同每卷首俱有虞山毛扆手校印記

虞炎序曰鮑照字明遠本上黨人家世貧賤少有文思宋臨川王愛其才以為國侍郎王薨始興王濬又引為侍郎孝武初除海虞令遷太學博士兼中書舍人一本云時主高照侍左右深達夙旨以此賦述不復盡其才思出為秣陵令又轉永嘉令大明五年除前軍行參軍侍臨海王鎮荊州掌知內命尋遷前軍刑獄參軍事宋明帝初江外拒命及義嘉敗荆士震擾江陵人宋景因亂掠城為景所殺時年五十餘身既遇難篇章無遺流遷人間者往往見在儲皇博採群言遊好文藝片辭隻韻罔不收集照所賦述雖乏精典而有超麗爰命陪趨備加研訪年代稍遠零落者多今所存者儻能半焉

鮑氏集十卷 明活字本

**宋鮑照撰**

虞炎序

東臯子集三卷 舊抄本 趙清常藏書

**唐太原王績無功著**

呂才序

陸淳刪東臯子集序

趙氏手跋曰金陵焦太史先生本錄出按于清溪官舍時萬曆三十七年十月十四日漏下初鼓清常道人

張說之文集二十五卷 明刊本

**唐張說撰**

前有墓誌銘 張九齡撰

張說之文集殘本十卷 影寫宋刊本

**唐張說撰**

卷首喜雨賦二首一題御製一題應制明刻

本刪去御製應制等字卷五醉中作明刻本有題無詩卷六廣州蕭都督入朝過岳州晏餞後缺一頁計詩七首題一行錢牧翁從宋本抄補上方有毛扆題識云此一葉世行本皆缺牧翁先生從宋本手抄補入後之讀此書者勿易視之唐丞相曲江張先生文集二十卷 明成化刊本

**唐張九齡撰**

邱濬重刊序 成化九年

杜工部集二十卷附補遺 影寫宋刊本 絳雲樓藏書

**唐**前劍南節度參謀宣義郎檢校尚書工部員外郎賜緋魚袋京兆杜甫撰 宋王楙編 凡詩十八卷雜著二卷後

附遺文九篇為補遺元稹墓銘附二十卷末均與直齋書錄解題合蓋即王原叔編定本也杜集以吳若本為最善

此又若本之祖中遇宋諱皆缺筆板心有刻工姓名如張逢史彥余青吳圭等名蓋從宋雕本影寫者絳雲樓述古堂俱有印記

王原叔記 寶元二年

王琪後記 嘉祐四年

儲光義集五卷 明活字本 楊夢羽藏書

**唐儲光義撰** 楊夢羽葉石君俱有印記

顧况序

岑嘉州詩七卷 明初刊本

**唐岑參撰** 金吾初藏明刊八卷本繼得此本反覆考核

確知此本為原本而八卷本為重編本也何以言之歷考唐書藝文志崇文總目郡齋讀書志通志通考焦氏經籍

志並云十卷從無作八卷者此本分類編次與確序所云  
區分類聚合始五言古詩終七言絕句首尾完具似無脫  
佚意者詩七卷文三卷合十卷歟此本或止刊詩集或并  
刊文集而後經散佚均未可知確序勒成口卷卷字上一  
字刊去或者原作十卷書賈得七卷本疑係不全故刊去  
十字以泯其迹歟刊八卷本者既析七卷爲八卷又改勒  
成十卷爲勒成八卷而原書面目遂致不可復識通人碩  
彥且有以善本許之者非未見原書之過歟排律之名始  
于楊士宏八卷本有排律一類而此本無之則此本在八  
卷本前尤顯然者也卷四有唐博陵郡安喜縣合岑府君  
墓銘果毅張先集墓銘二首八卷本俱未載餘與八卷本  
互異者甚夥李滄葦書目有岑嘉州詩七卷與此本合

### 杜確序

陳氏手跋曰是書先君子所貽行款低縮紙薄而堅當是  
宋板宋字似中用紙拓歲久淪落每以遺脫是懼頃索居  
多暇復易楮重粘竟日之勞遂令幾百年之物完綴如故  
虛擲光陰坐失有爲凡事皆然爲之感惜乙酉嘉平十有  
一日孝將氏識

### 徐侍郎集二卷

舊抄本

唐中書侍郎集賢院學士徐安貞撰 附錄舊唐書本傳  
等六則及顧况趙抃王瓚詩三首袁文紀贊一首

### 畫上人集十卷

賜書樓抄本

錢齋室藏書

**唐**吳興釋皎然撰 首末葉俱有木記云百計尋書志亦  
迂愛護不異隨侯珠有假不返遭神誅子孫不寶真其愚

蓋錢叔寶家藏書印記也

御書院牒 貞元八年

于迪序

葉氏手跋曰畫上人集二冊乃無錫談學山綽板釘宋抄本磬室因得借錄予與錢子契合遂借錄焉畫上人集人有藏者不能如此之備予何幸躬逢其盛因記以示後人云括蒼山人恭煥志

劉隨州集十卷

明活字本

楊夢羽藏書

**唐劉長卿撰**

卷首有楊夢羽葉石君印記

錢考功集十卷

明活字本

**唐錢起撰**

唐陸宣公集二十二卷

元至大刊本

**唐陸贄撰**

權德輿序

蘓軾進奏議劄子

淳熙講筵劄子

唐內相陸宣公實鍾樵李扶輿清淑之氣平生所志不負天子不負所學雖遭遇德宗時弗克展布所蘊然忠誠懇惻訓辭深雅崎嶇奉天實資翼贊今其代言奏對家傳人誦自漢賈誼董仲舒諸賢皆莫之能擬此中朝達治體躋顯仕者往往祖述以爲一代典章信知宣公之文鑿鑿可見之日用非徒託之空言也今其宅里某水某丘已難髣髴獨仁義百篇炳如丹青讀其書尙友其人至今生氣凜凜郡學舊有奏議制誥凡二十二卷歷歲幾二百亥豕魯

魚弗便觀覽盱眙子中王公來守是邦一廉自律三年政成提綱學校備殫乃心拘徵逋租增鑄祭器踵繪從祀惠至渥也復念此書字畫漫舛特甚乃以推官胡公德修家藏善本詳加讎正重新刊梓以幸多士繼自今使宣公之文復大行于世其于鄉泮亦與有榮焉敬書卷末以識歲月云至大辛亥季秋嘉興郡博士厲一鶚拜手敬書

注陸宣公奏議十五卷

元至正刊本

**宋郎暉注**

前有紹興

當作熙

二年暉進書表題銜稱迪功

郎紹興府嵎縣主簿臣暉不著姓案清波雜志曰輝友人郎埴晦之杭人嘗注三蘓文及陸宣公奏議投進元吳文正公集陸宣公奏議增注序曰因郎氏舊注而加詳劉岳申申齋集曰宋紹興中有郎暉嘗注宣公奏議以此知爲

郎暉也表後云紹興二年八月初七日進呈案表中有云恭惟至尊壽皇聖帝考淳熙十六年光宗受內禪尊孝宗爲至尊壽皇聖帝次年改元紹熙則興爲熙字之誤無疑卷一後有至正甲午仲夏翠巖精舍重刊木記脉望館書目著錄

權德輿序

蘓軾進奏議劄子

進表曰迪功郎紹興府嵎縣主簿臣暉言臣所註唐陸宣公贊奏議十五卷繕寫成秩謹詣登聞檢院投進者不負所學期納忠於一時據直而言果爲法於後世可謂皆本仁義非徒曲盡事情雖殫見聞奚採涯涘臣誠惶誠懼頓首頓首竊以言有逆順道存是非大臣知憂國而愛君有

懷必吐小人喜乘時而射利流弊無窮顧忠邪之跡易明  
豈聽納之際難辨倘人主用心或好順而惡逆則羣下進  
說必以是而爲非此忠言多致於不行而吾道每憂其難  
合惟陸贄蘊經濟之畧值德宗當艱難之初勢雖危疑動  
必剴切無片言不合於理靡一事或失於機策之熟見之  
明若燭照而數計言之重辭之複冀陽長而陰消惜乎柄  
鑿不侔冰炭難入方其多難姑屈意以聽從逮至小康遽  
追仇而擯棄主眷則異臣心益堅第知卹天下之安危豈  
復計吾身之利害論諫數百雖晦蝕於建中正元之間勸  
講再三迺發揮於元祐淳熙之盛幸聖賢之默契宜今古  
之同符恭惟至尊壽皇聖帝性本誠明學全終始旣多識  
於前言往行道積厥躬猶不遺於片善寸長近取諸贄折

衷一語鼓動四方斯蓋恭遇皇帝陛下法乾行健繼離嚮  
明治已至不忘於兢業德雖盛尤樂於討論粵自潛藩屢  
披奏牘惟精惟一固得於問安視膳之餘嘉謀嘉猷復取  
於攷古驗今之次臣自慙魯鈍有愧師承妄加採摭之工  
僭釋精英之論庶期觀覽易究端倪畫蛇寔免於支離坐  
井曷窺於小大徒傾口耳何補涓埃伏望皇帝陛下置座  
之隅以古爲鑑廓日月之明斷制庶政恢江海之量容納  
衆言監瓜果而賞不妄加念兵食而將不輕用斯皆治道  
之急務固亦聖主所優爲使毫釐有濟於斯民則竹帛愈  
光於前哲其奏議并目錄共十一冊謹隨表上進以聞臣  
冒犯天威下情無任激切屏營之至臣誠惶誠懼頓首頓  
首謹言紹興二年八月初七日進呈

中興奏議本堂舊刊盛行于世近因回祿之變所幸元收謝疊山先生經進批點正本猶存於是重新綉梓切見棘闡天開策以經史時務是書也陳古今之得失酌時務之切宜故願與天下共之幼學壯行之士倘熟乎此則他日敷奏大廷禹臯陳謨不外是矣至正甲午仲夏翠巖精舍謹誌

朱文公校昌黎先生文集四十卷外集十卷附集傳遺文遺詩  
元刊本

**唐韓愈雜錄**

晦菴朱先生考異留耕王先生音釋

朱子序

王伯大音釋序

寶慶二年

增廣注釋音辨唐柳先生集四十三卷別集二卷外集一卷附

錄一卷

元刊本

述古堂藏書

**唐柳宗元撰宋**

南城先生童宗說注釋新安先生張敦頤

音辨雲間先生潘緯音義

卷首有毛友仁及錢遵王印

記

陸之淵音義序

乾道三年

劉禹錫序

毛氏手跋曰萬歷丙子余泊舟荆溪偶至王鵝湖書肆閱此因授值攜歸以舊所藏者參之乃元延祐間刻也喜成一二帙援筆志之會川子友仁

劉賓客文集三十卷外集十卷

舊抄本

**唐**正議大夫檢校禮部尚書兼太子賓客贈兵部尚書劉

禹錫撰

呂和叔文集十卷

舊抄本

**唐**朝議郎使持節衡州諸軍事守衡州刺史上騎都尉賜

緋魚袋呂溫撰 後附柳宗元誄

劉禹錫序

皇甫持正文集六卷

毛板校本

**唐**皇甫湜字持正撰 卷末有題識云康熙己亥孟冬將

叢書堂抄本對校

唐李文公集十八卷

明成化刊本

唐山南東道節度使檢校戶部尚書李翱字習之撰

何宜序 成化乙未

歐陽行周文集十卷

舊抄本 臨何氏義門校

**唐**將仕郎守國子監四門助教晉江歐陽詹字行周撰

李貽孫序

康熙乙丑重陽前一日從內弟吳紫臣借得所收葉文莊公家抄本手校改正數處葉本與此亦互有得失俟訪得宋雕及他藏書家善本當再校之行周文尚當為李元賓之亞然其諸序固未減梁補闕特不宜於多爾昆湖舟中

義門焯記

李元賓文集五卷

舊抄本 曹倦圃藏書

**唐**李觀撰 卷首有携李曹氏印記

陸希聲序

大順元年

賈浪仙長江集十卷

精抄本 錢履之藏書

**唐**范陽賈島浪仙撰

前有新唐書本傳韓文公送島歸

范陽詩題浪仙贊及蘇絳撰墓銘唐宣宗賜島墨制

王遠後序

紹興二年

沈下賢文集十二卷

舊抄本

**唐**沈亞之字下賢撰

無名氏序曰文章盛衰與世升降唐之文風大振于貞元元和之間韓柳倡其端劉白繼其軌當時學者涵濡游泳攬其英華洗濯磨淬輝光日新苟有作者皆足以拔出流俗自成一家之語則吳興之文是已公諱亞之字下賢吳興人元和十年登進士第歷辟藩府嘗游韓愈門李賀許其工爲情語有窈窕之思其後杜牧李商隱俱有擬沈下賢詩則當時稱聲甚盛而存于今者既不盡見世之所有復舛錯訛謬脫文漏句十有二三頃得善本再加校覈皆得其正恐其藏于篋笥不得與好學之士共其玩繹因欲

命工刻鏤以廣其傳惜乎志有待而未能也元祐丙寅十

月一日題

李端集四卷

明活字本

**唐**李端撰

白氏文集七十一卷

宋紹興刊本

玉蘭堂藏書

**唐**白居易撰

中遇構字注犯御名桓字注淵聖御名蓋

紹興三十年以前刊本也案讀書敏求記云宋刻白集從婁東王奉常購得後歸之滄葦此本玉蘭堂王煙客季滄葦俱有印記蓋文氏故物後歸王氏轉入錢氏季氏者闕卷三十一至三十三又三十五三十六共闕五卷抄補元稹序

長慶四年

樊川文集二十卷別集一卷外集一卷

明重刊宋本

唐中書舍人杜牧字牧之撰

裴延翰序

集賢校理裴延翰編次牧之文號樊川集者二十卷中有古律詩二百四十九首且言牧始少得恙盡搜文章閱千百紙擲焚之纔屬留者十二三疑其散落于世者多矣舊傳集外詩者又九十五首家家有之予往年於棠郊魏處士野家得牧詩九首近汶上盧訥處又得五十篇皆二集所逸者其後池泛舟宴送王十秀才詩乃知外集所亡取別句以補題今編次作一卷俟有所得更益之熙寧六年三月一日杜陵田槩序

李義山集三卷

舊抄校本

唐李商隱撰

末有護淨居士跋中有家定遠云云蓋馮

氏定遠昆季行也

馮氏手跋曰崇禎甲戌三月初十日護淨居士勘完此書先用錢憲副春池公本寫有篇次無卷日後得牧齋錢禮部宋板始有卷目又請謝行甫錄之方爲善本首尾十年始得完善後有得此本者慎勿輕之是日爲清明日

又曰乙亥六月十五日孫方伯功父丈以一本見示煥然若披雲霧凡錢本之可疑一朝永釋因與家定遠何士龍又按一過凡卷中粉塗處皆是也孫本三大帙爲無錫華氏物卷凡三亦分上中下遘桓諸字俱不避其爲北宋本無疑也廿七日始按完乃知錢本直坊本耳錢本亦有善處併記卷端

李商隱詩集三卷

毛板按宋本

**唐李商隱撰**

後有太丘氏跋金吾藏舊抄本汗簡後有

太丘陳鴻跋案陳鴻字鴻文初名煌圖工大小篆著隸釋篆韻六卷詩集十卷

陳氏手跋曰丙戌正月借孫孝若家北宋板本對正時家南浦映鈔全部三卷完復將此讎校過筆畫無譌因記二月初二日太丘氏

温庭筠詩集七卷別集一卷 毛板校宋本

**唐温庭筠撰**

前有題識云從馮定遠攜錢子健校本對

過未有南浦題識云假錢遵王抄宋本重勘

丁卯集二卷續集三卷 舊抄本 馮氏藏書

**唐**

**鄧州刺史許渾撰**

格闕外有馮氏藏本四字末有題

識云崇禎庚午借柳大中本抄

碧雲集三卷

影寫宋刊本 從吳門黃氏藏宋刊本影寫

**唐**

**登仕郎守新淦縣令知鎮事賜緋魚袋李中撰**

**目錄**

後有臨安府棚北睦親坊南陳宅書籍鋪印一行

黃氏手跋曰予見毛刻碧雲集多闕文及見宋刻初不解毛氏何以有闕適坊友以毛藏舊鈔本來始知毛刻據元本故所闕如此抄本中多子晉手按字可與宋本並儲古香古色益動人珍重前賢手跡之意不烈

李羣玉詩集三卷後集五卷 影寫宋刊本 從吳門黃氏藏宋刊本影寫

**唐李羣玉撰**

前有羣玉進詩表延英口宣勅旨及令狐

綯薦狀守宏文館校書郎制詞後有臨安府棚前睦親坊南陳宅書籍鋪刊行一行

黃氏手跋曰余家向藏舊抄本李羣玉集有三本未知何

本爲善及得宋刻此集知葉鈔最近蓋行欵同也若毛刻李文山詩集迥然不同曾取宋刻校毛刻其異不可勝記且其謬不可勝言信知宋刻之佳矣毛刻非出宋刻本故以體分統前後集併爲三卷或以意改之抑別有本七言律羨三首七言絕羨一首宋刻皆無之五言古詩二十四韻一首未有缺宋刻及抄俱有而毛刻獨注云缺則所據必別有本矣不烈

李羣玉詩集三卷後集五卷

精抄本

錢履之藏書

**唐李羣玉撰**

守宏文館校書郎制詞後有臨安府棚北

大街睦親坊南陳解元宅經籍鋪印兩行蓋從宋刊本傳錄者末題嘉靖丁未夏季松逸山居童子王臣錄卷首有錢履之讀書記印記板心有竹深堂三字

唐皮日休文藪十卷

明正德刊本

**唐皮日休撰**

自序

咸通丙戌

柳開序曰讀皮子文其目曰藪凡藪者澤也又曰淵藪也以其事物萃集之也古國之大各有藪焉魯大野晉大陸秦陽陞宋孟諸楚雲夢吳越具區齊海隅燕昭余祁鄭圃田周焦護皆爲藪也謂是地之廣故以名之也魯晉秦宋楚吳越齊燕鄭周分里之不同各名以異之焉然一天地矣予謂皮子之名藪也疑爲以其文之衆作之藪也又疑爲若魯晉秦宋楚吳越齊燕鄭周以其文類不同各爲藪也是文之類雖不同而曰藪亦若魯秦宋楚吳越齊燕鄭周之藪雖異而揔一天地也都以文而統之是曰文藪也

疑而愛之觀其首又無所序說遂盡而讀之見其藪之爲意也霍山爲賦之藪首陽爲碑之藪隋鼎爲銘之藪易商君傳爲讚之藪周昌相趙爲論之藪陵母爲頌之藪心爲箴之藪移成均博士爲書之藪三羞爲詩之藪藪之于文不可盡舉若九賦十原決疑雜著之類也約其名幾尤者例而取之也謂賦下題名也大野之下國之藪焉霍山之下文之藪也孰謂皮子文藪之義不曰是乎將不曰是卽不在此而在於彼也傳者得以取義焉

袁表題後 正德庚辰

雲臺編三卷 舊抄本 汲古閣藏書

**唐**都官郎中鄭谷撰 後附補遺十三首及祖無擇撰墓表又附錄四則曹鄴等投贈詩八首則毛氏子晉所輯也

後附毛氏手跋清字缺末二筆蓋避家諱每頁格闌外有毛氏正本汲古閣藏八字

自序 乾寧甲寅

童宗說後序曰宗說始見唐書藝文志所載鄭谷雲臺編三卷以謂谷之詩盡於此及考祖擇之所作墓表稱雲臺編與外集詩凡四百篇行於世自至和甲午迄今百有七年外集又缺其半則知谷於道舍詮次之外著述尙多而傳者寡也谷字守愚宜春人永州刺史史之子幼負雋聲司空圖許其爲一代風騷主而薛能李頻當世名士咸愛重之擢第於光啟三年嘗作拾遺補闕乾寧中以尚書都官郎中退居于仰山東莊之書堂高尙其事以至于卒蓋唐自牛李植黨之後學士大夫不擇所附貪得躁進者罕

能獨守於義命之戒而不牽於名利之域至於吟咏性情  
出處默語之際能不悖於理者固希矣况至於僖昭之世  
哉守愚獨能知足不辱盡心於聖門六藝之一豐入而晉  
出之論其格雖苦不甚高要其鍛鍊句意鮮有不合於道  
其所得於內者又能信而充之韜晦里閭全去就始終之  
大節嘗取其退居淨吟等篇三復而賢之因其言以求其  
爲人又知其行之可賢也惜其有補於風教而重之者以  
村學堂中兒童諷誦往往視爲發蒙之具曾不獲齒偏裨  
於李杜詩將之壇日往月來殆將磨滅蓋跡其表裏所得  
而以世俗耳鑿決之彼烏能知守愚之意哉顧宗說道榛  
力綿豈足軒輊其詩使得以行遠因典教于此而重其鄉  
之先賢之難得也亟請諸郡邑葺其墓宇又得賢史君家

藏善本銀木流通而序其顛末所以致區區之意焉

毛氏手跋曰按新舊唐書俱不列鄭谷傳惟藝文志載雲  
臺編三卷又宜陽集三卷注云字守愚袁州人爲右拾遺  
乾寧中以都官郎中卒於家歐陽永叔謂兒時曾讀之其  
集不行于世今宜陽集不可得見吳中所傳雲臺編廼王  
文恪公從秘閣抄出凡三卷又補遺一十有三首前有鄭  
都官自序後有祖刺史墓表童參軍後序洵是善本余因  
錄唐詩紀事袁州志二則洎唐宋諸家詩附焉但集中佳  
篇最多獨鷓鴣之名最著不解何故其輦下冬暮詠懷一  
篇與才調迴異豈韋毅改本耶父史字惟直開成元年進  
士歷官至刺史紀事又云終國子博士著賦百篇亡曾見  
永州送姪歸宜春詩云宋玉正悲秋那堪更別離從來襟

上淚盡作鬢邊絲永水清如此哀江色可知到家黃菊坼  
亦莫怪歸遲又經過池陽廉使崔君悅一妓行雲有詩云  
最愛鉛華薄薄粧更兼衣著又鵝黃從來南國名佳麗何  
事今朝在此行臨岐博陵公輟贈之兄啟亦能詩嚴塘經  
亂書事云塵生宮闕霧濛濛萬騎飛龍幸蜀中在野傳巖  
君不夢  
衛懿霍何功雖知四海同盟久未合中原武  
備空星落夜原妖氣滿漢家麟閣待英雄又梁園皓色月  
如珪清景傷時一慘悽未見山前歸牧馬猶聞江上帶征  
鞞鯢魚爲隊潛鱗困鶴處雞群病翅低正是四郊多壘日  
波濤早晚靜鯢鯢雖未得其集亦足見豹斑矣隱湖晉潛  
在跋于載德堂中

司空表聖文集十卷

舊抄本

**唐司空圖字表聖**

自序

光啟三年

元英先生詩集十卷

叢書堂抄本

汲古閣藏書

**唐方干撰**

前有元英先生傳

孫郃撰

後有集外詩兩首文

獻通考等書十三則

王贊序

乾寧丙辰

毛氏手跋曰干字雄飛真應仙翁之後進士肅之子協律  
章八元之甥也貌寢又免闕晚年遇醫補之里中呼爲補  
唇先生爲人質野每見客設三拜曰禮數有三戲稱爲方  
三拜或謂其謁廉師誤三拜故云亦好事者爲之也樂安  
孫郃作傳不若吳融贈詩云把筆盡爲詩何人獻天子句  
滿天下口名聒天下耳不識朝不識市曠逍遙閒徙倚一

杯酒无萬事一葉舟無千里衣裳白雲坐卧流水霜落風  
高忽相憶惠然見訪留一夕一夕聽吟十數篇水榭林蘿  
爲岑寂拂旦舍我亦不辭携筇徑去隨所適無處覓雲半  
片鶴一隻宛然畫出元英先生小像居桐廬邑西南四十  
里白雲原又名鷓鴣原與釣臺遙對宋范仲淹登臺東望  
絕壁插天林麓蒼秀白雲徐起問之廼知唐處士方干舊  
隱處裔孫蒙鼎讀書其上遂賦詩曰風雅先生舊隱存子  
陵臺下白雲村唐朝三百年冠蓋誰聚詩書到遠孫遂繪  
像于臺以配子陵詩云高山仰止景行行止雖不能爾至  
心尚之崇禎庚午秋七月四日虞山毛晉跋於讀禮齋  
又曰唐志元英先生詩十卷與孫傳王序相符馬氏謂方  
干詩一卷想未見全豹耳余向藏南宋版雖亦十卷傳序

弁首詩不及三百考之伊楊弇所編三百七十餘之數  
散逸已多矣故張爲主客圖所采貽天台中峯客一聯云  
枯井夜聞鄰果落廢巢寒見別禽來集中未見又從別本  
得如干首并贈篇紀事數則附錄於後晉陵徐氏刻本更  
多逸詩若五言律湖上言事以下九首七言絕夜會鄭氏  
昆季以下四首不知何人贗作第集中窻接停猿樹岩飛  
浴雀泉雪折停猿樹花藏浴鶴泉纔吟五字句又白幾莖  
髭吟成五字句用破一生心之類自用自句頗多比之王  
摩詰水田飛白鷺夏木囀黃鸝又逕庭矣毛晉又跋

杜荀鶴文集三卷

舊抄馮氏手技北宋本

唐杜荀鶴撰

每頁格闌外有馮彥淵藏本五字

顧雲序

馮氏手跋曰此予家藏南宋板抄本癸卯春仲借得隱湖毛氏北宋版細按一過異同處悉兩存之海虞馮武

葉氏手跋曰馮氏書法爲臨池正傳此卷其所抄本也道勁流麗出入鍾王不知何時流落敝篋半充脉望之腹頃因晒書檢得深悲其遭際之失所也拔登鄴架眠食與俱又慮其糜蠹之難存也特爲裱而裝之以壽於世其詩雖晚唐直入風雅亦工部之的派也佳章妙筆可稱合璧乾隆十年九月庚午朔居由葉坦跋

唐風集三卷

精抄本

錢履之藏書

**唐**九華山人杜荀鶴

卷首有錢履之讀書記印記板

心有竹深堂三字

唐秘書省正字先輩徐公鈞礪文集十卷

抄本

從子謙姪藏

舊抄本影寫

唐徐夤昭夢著 前有夤裔孫玩序曰公故有賦五卷探龍集五卷詩二百五十餘首今皆亡失延祐丁酉叔父司訓公于洛如金橋林必載家得詩二百六十餘首復于己亥歲族叔祖道真公遺賦四十篇合而寶之暫編成卷云云則此本蓋玩所重編也缺卷四賦一篇卷五一卷賦十篇內江令歸金陵過驪山樊噲入鴻門隱居以求志山暝孤猿吟白衣入翰林雷乃發聲寒賦八篇伏讀

欽定全唐文俱有可據以補入并多均田賦衡賦二篇爲此本所未載者此本薦藺相如使秦元宗御製盧徵君草堂銘陳後主獻詩外舉不避讎避世金馬門東陵侯弔蕭何貴以賤爲本管仲棄酒卽寂寞以求其音知白守黑爲天下

式太極生二儀員半千說三陣文王葬枯骨駕幸華清宮  
再幸華清宮卞莊子刺虎鑄百鍊鏡元宗御注孝經割字  
刀子福善則虛竹篋子等賦共二十一篇全唐文俱未載  
殆偶未見此本歟

黃族孫師仁序曰正字諱黃字昭夢按五代史閩世家稱  
正字唐時以進士名依王審知仕宦九國志列傳正字莆  
田縣人乾寧初舉進士禮部試止戈爲武賦一燭纔盡已  
就有破山加點擬成無人之句侍郎李擇覽而奇之是歲  
釋褐秘書省正字歸寧于閩中屬江淮盜蠡起退居延壽  
溪王審知聞之辟居幕下而禮待簡畧內不能平一旦拂  
衣去曰丈尺之水前陂後堰安能容萬斛之舟乎尋舊隱  
慨然有長往之志王廷彬刺泉州每同遊賞及陳郊倪曙

等賦詩酣酒爲樂凡十餘年求還所居嘗被病遣求藥物  
于廷彬答書曰善自調護亦可自開豁三皇五帝不死何  
歸蓋舉賦語以戲之竟卒于延壽之別墅本朝張丞相齊  
賢記正字未第時道汴州進謁梁祖面賦無雲雨篇立就  
其斷句云爭表梁王造化功大蒙賞遇及解褐東還祖爲  
開宴醉中誤觸諱歸館了悟憂在不測複製遊大梁賦以  
獻其畧曰客有得意還鄉遊于大梁遇郊垌之耆舊問今  
古之侯王父老曰且說當今休論前古昔時之功業誰見  
今日之聲名有觀中一聯云遂使千年漢將憑吉夢以神  
符一眼胡奴望英風而胆喪祖曾夢韓信授以兵法胡奴  
指李克用也祖讀至此大悅令軍士傳寫皆諷誦之敕字  
酬一縑不復責前事按崇文總目正字賦五卷探龍集一

卷題曰僞唐徐某撰正字實未嘗仕僞唐也師仁家故有賦五卷探龍集五卷正字自序其後又于蔡君謨家得雅道機要一卷又訪于族人及好事者得五言詩并絕句合二百五十餘首以類相從爲八卷并藏焉正字人生幾何賦至今膾炙人口兒童婦女徃徃道徐先輩而集有贈渤海高元固詩序云高見訪于閩中言本國得斬蛇賦御溝水賦人生幾何賦家家皆以金書列爲屏障又自詠詩註云溫陵使宅有圖障二面張林西樓書手作迴文八體詩每一首顛倒讀成八首以此知正字之文不獨行于當時名于後世亦播于異域也然八體迴文詩尋討未獲小說載紅綾餅餡絕句亦不見全其餘碑碣之屬甚衆類皆亡失豈其賦名特高故他文遂不俱傳歟今觀賤疏頗類玉

溪而律詩精練亦不減同時韓致光吳子華諸人也惜乎遭罹亂世不獲少伸其志其來閩中且有前陂後隰之歎安有爲朱溫所屈哉殆亦遜言避禍不得不爾也張丞相記頗詳足以附見建炎三年三月序

黃裔孫玩序曰文集者八莆第五代祖先輩公所撰文也公諱黃字昭夢登唐乾寧進士第試止戈爲武賦魁天下授秘書省正字先輩時人推尊之稱也釣磯乃歸隱適意處號也予嘗觀舊譜載十二代著作佐郎賜紫魚袋師仁公所著文集序云先輩公文字頗多家故有賦五卷探龍集五卷又于蔡君謨家得雅道機要一卷詩二百五十餘首蓋詳論之既有其序時必有集今皆亡失故常鬱鬱不樂凡對族人惟以不得其文爲憂嘆至延祐丁酉歲叔父

司訓公于洛如金橋林必載家得詩二百六十餘首復于  
已亥歲族叔祖道真公遺賦四十篇不勝欣慰合而寶之  
後則屢求未能再得洎邇歲塵事稍息謹述世緒聲跡已  
詳于譜牒復讀威武軍殿中侍御史劉公山甫撰公墓誌  
銘謂公所著詞賦感動鬼神搜括造化又謂悲泣百靈包  
羅萬象明珠無價至道不文窮達理性諷誠澆淨合先聖  
賢之意矣讀之至是愈有所感今則據其所得詩賦暫編  
成卷裝潢類諸譜牒合與族人暨諸君子共之可以知吾  
祖先手澤尚存而流衍無窮抑祝厥後子孫勉而求之以  
增是卷庶不負吾故家文獻之烜燿遂書之以爲後之識  
也玩可珍謹識

讒書五卷

抄本

從照曠閣藏本傳錄

**唐**江東羅隱撰

前有吳越備史本傳是書郡齋讀書志

著錄今讀其書大抵皆憂讒畏譏憤時嫉俗之語故其書  
不甚流布直齋書錄解題云隱有淮海寓言及讒書求之  
未獲隨齋批注云讒書刊于新城縣則是書在宋已罕觀  
矣此本從錢叔寶家影元抄本轉輾傳寫者

余少讀羅公昭諫嚴陵釣臺遺刻蓋所著讒書之一者氣  
節凜然煜煜方冊間每以未睹全書爲恨近客徽學會公  
之遠孫雲叔來爲學正因得拜觀讒書及所賦詩大抵忿  
勢嫉邪舒泄胸中不平之蘊焉耳公晚唐節士也抱負卓  
犖遭時不偶受知吳越錢氏幕辟歷仕給事中諫議大夫  
首勸調師勤王問罪朱溫雖錢不見聽而依中國以自固  
遇真主納款歸疆終其身及其子若孫無僭竊之志徃徃

皆出公平日講明之素也唐末僭偽紛起立其朝者安食厚祿充然無復赧容如公沉淪下僚氣節弗渝者幾何人吁士以氣節爲重而文辭特其餘事在昔儉邪輩豈無絺章纈句取媚一時而泯泯莫聞公氣節可敬可慕凡片言隻字皆足以傳世况其著書垂訓者乎新城楊令君舊嘗梓行久而失其板雲叔不忍廢墜割俸重刊亦可謂克承先志矣讀者當知公之氣節盡在是書而不可徒以其文辭例視之也大德六年仲秋後五日前進士東嘉黃真輔德弼父書

自序

宋子京唐書無羅隱姓名歐陽永叔五代史記吳越世家始書錢鏐以沈松皮光業林鼎羅隱爲賓客在唐昭宗景

福元年壬子之前去天祐四年丁卯唐亡十六年耳唐懿宗卽位咸通元年庚辰隱在京師舉進士留七載而不第咸通八年丁亥著讒書唐僖宗光啟二年丙午錢鏐知杭州丁未拜杭州刺史今方輿勝覽取杭州圖志書隱唐光啟間爲錢唐令辟掌書記爲給事中遷發運使卽皆錢氏之除擢也而歐陽公稱爲錢鏐賓客何耶自咸通改元至景福改元厯懿僖昭三十三年隱之本末可考者如此所爲讒書乃憤悶不平之言不過於當世而無所以泄其怒之所作詳見淳熙二年乙未知新城縣楊思濟集敘裔孫應龍見佐學徽州將割俸重刊是書俾識其本末大德六年壬寅六月十九日辛巳紫陽山人方回跋

隆慶二年二月中旬借顧從化元板本抄第二卷內闕二

葉鈔完因以吳越備史列傳書卷首錢穀記

羅昭諫讒書五卷著錄於郡齋讀書志至直齋書錄解題已云求之未獲永樂大典中有隨齋批注曰讒書近刻於新城縣令方萬里跋所謂淳熙二年乙未未知新城楊思濟集敘殆卽指此辛亥秋日從姚子英三假其舊藏寫本第五卷及原跋讀之內惟與招討宋將軍書說石烈士拾甲子年事請追癸巳日詔疏四首載入姚叔祥所刊羅江東集餘皆近代所罕傳雖殘編斷簡亦希世之珍也因亟錄之聞吳興書估言吳門藏書家見有全帙尚願宛轉借抄未知能逮斯志否至命名之故大約不離乎憂讒畏譏同時沈顏有聲書意猶是也癸丑寒食日松陵楊復吉識

海寧吳君槎客因吳江楊進士彗樓有言聞吳興書賈云

吳門藏書家見有全帙尚願宛轉借鈔故託其同邑陳仲魚向余借鈔其實余無此書遂謝之此乙丑春事也後余從書肆果得吳枚菴鈔本有前四卷可補吳槎客本急寓書仲魚取槎客原本五卷相質證實較吳枚菴多所裨益而前四卷復賴余所得枚菴鈔本足之爰倩鈔胥鈔此以寄他日可語彗樓俾遂宛轉借鈔之願云嘉慶丙寅正月十一日吳趨黃丕烈識

白蓮集十卷附風騷旨格一卷

舊抄本

**唐** 廬岳僧齊已撰

孫光憲序

天福三年

禪月集二十五卷

舊抄本

雁里草堂藏書

**唐** 西岳僧貫休撰

彙域後序

蜀乾德五年

周伯奮跋

嘉熙戊戌

童必明跋

同上

愛日精廬藏書志卷二十九終



